

luqaasinin Thapoono

*Imbaa Wonte Yesus kiristosisa
dhaqintan giyndhan giyayno
Bayrosa Uspino*

Ardinita

luqaas hambhe kidi hakimine; luqaas Yesus yinaa kinin elana tabhi lamana kisa Tamara gidirtee. Yesus yisa tarjamona qante kinin yitaa Bhowloosa anamone. luqaas Yesus Kiristosisa dayntan goyndhan kaa mathaapete ki thaapade; tapir Yitadhanasa Waadiman mathaapinte birayse woysadhon misken ooninsa ki thaapade. Yesus kala hatel seensona qolima maatayse kinin doonsa eedina ardee uspinka luqaas mathaapindhan ki thaapade.

Kaa mathaapedhan Ayiwuditay hama eenara katika Giriki eenana kaabayse luqaas ki thaapade. Giriki eenana le'ea gebhisa birara yedayse gon hama eedi zagate ki daade. luqaas kinin zage gonin hama ea Yesus kinin doondhan dhoyana ki thaapade.

Kaa mathaapesa iinte lukaas birara yedayse machin wodandar Bayrosa dhachintan uspinno een wulna konin doondhan kida giye. Mathaapino Yesus Eedi Naas daayse Israel peen wul gidir payya waadima ki hayade, kino waadimano peen ogora sagayse eedi wulna konin yeskodisi Yesusin qabondhan koda dhoye.

Kaa mathaapedhan raqi tobhadar kashana damima ko damime

1@ Mathaapino harrna konin thaapadhoono (1:1-4)

2@ Eedi Naasisa ashkimbhenno (1:5--4:13)

3@ Eedi Naasin Galila gidir kin waadimoono (4:14--9:50)

4@ Eedi Naasin Yiwuda peensa Yordaanoos bazinsa saabar kin waadimoono (9:51--18:30)

5@ Eedi Naasin Yerusaalem gidir kin waadimoono (18:31--21:38)

6@ Eedi Naasin kin diynka kinin waadimoono (22:1--23:56)

7@ Eedi Naasin kin dhaabhenka kinin waadimoono (24:1-53)

1

ukunse1

¹ Goshpadhaa Topoloos; Wosa sharnte yera haydhanasa gembho eeno dhonkondhan yin damadha thapayse ko daade`. ² ogorol dhonkono birara

yedayse aapinka hapayse tarja maatanabe qalin giyate daana kin sasikonone.
³ intal ibar wuldhan birara payya hayayse in shedonsa budobar dhonkonsa gutendhan kalayse hana i thaape ina payya matayse ko hapadhade: ⁴ Kodhanl inin hayayno han tamarono yiro gon kon dhondhan haa dhesene.

Noqonka Shiye Wannissa Adhintan Goyn Bayrosa Ergan genta Gabreelin Giyoono

⁵ Herodis Yiwuda peente kinin bitimon wodanka, Abiya muldhanara gudilasa waa Zakarias hambhe ki daade. Elsaabeth hambhayno Kisa geshonol gudile Aron muldhanarane. ⁶ kidi lamanal Bayro kinin giyonbe kisa dambinka yer siya yindare haapadhama maatayes Bayro birante tipa eedi ki daade. ⁷ Elsaabethil seeki konin doona, kisa naasi qolee; pir kidi lamanal kati geshidine.

⁸ rooro kala Zakariyas muldhana Bayrosa gazan ooninte kinin waadimensa keelin yeskona, kidi Bayrosa birante waadimate ki daade. ⁹ Bayrosa gazan ooninte ardayse qunyan ki gude gudulmakon dambinka kidar keelo ko yeskade. ¹⁰ Bayrosa gazan ooninte qunyan kinin guden wodanka eeno wul mayante woyayse Bayrodhan ko miske.

¹¹ Bayrosa ergangenta qunyan yindar guudadhen angamonsa mizaqambar woyayse ki daaka, Zakariyasna ki haapadhade. ¹² Zakariyasil kidhan yinin haapenka, targadhayse kati ki pimbhade. ¹³ Ergangenta kina yin ki giyade:- « Zakariyas, pimbhabhode! Bayro hasa miskendhan qansidine; geshono hano Elsaabeth naasi angi adha ko adhe; kisa nabinole Wannis hamayse hada ele. ¹⁴ Kinin adhadhona hana kati woza koda dee; gembho Eenol kin adhadhonka koda wozadhe. ¹⁵ Bayrosa birante gari kida maate. woynin hatasa cubadhonbe barsen wucadhan ki wucabhode; kidi adhadhima indansa iinte ki daaka,manpas gazanka kida thothe. ¹⁶ Kidi Israel zarisinsa gebhon eendhan Imba kisa Bayrodar kidhan kida maase. ¹⁷ kidi Bayrosa birante manpasinbe kantankabe Eelyasdisi maatayse Imbana woylamindhan naanadar ki maase; ee hamimina eanasa woylamindhan gazana eanasa pakalmakondar kida maase. Zarsindhanl Bayrona ashkimbyse kinin doodisi kidhan kida haye.»

¹⁸ Zakariyasil ergangentana <<Inta geshidine, isa geshonol geshidine. Keda koro gon konin doondhan harka ida dhese?» kina ki hamade. ¹⁹ Ergangental kina yin giyase ki masade, «Inta Bayrosa birante woye Gabreelne. Ogo wozisen dhalqindhan hana inin giyodisi Bayro idhan kinin nitona hakal i na'ade. ²⁰ yaa wodanin yeskenka hamen dhalqindhan amanatene; ogona koro inin giyono wul konin matenka yeka apo kaya hada maate; dhalqana damatane »kina ki hamade.


²¹ eenol Zakariyasdhan kaalate ko daade. Bayrosa gazan ooninte kinin kaponā, kati yershan ko yedade. ²² Zakariyas Bayrosa gazan oonira yinin utenka Eenbete dhalqan damaye. Ogonaqante Bayrosa gazan ooninsa iinte Bayrokal yer kinin haapondhan dhesidine; kidil dhoysoka kina eshkate apo

kaya maatayse ki shidhade. ²³ Bayrosa gazan ooninte kinin waadimen wodan maqaysaka, yinon oonindar ki ya'ade.

²⁴ Ogosa budonte kisa geshono Elisabeth sirmayse arpi dongi ooninte adhimbhayse ko dorqade. ²⁵ Kodil «Bayro yisa nashimakonka idhan kinin shedon wodanka kodisin yerin payyan ina ki hayade; zarisinsa bakente idar doon bagintondhan ki shiishade» ko hamade.

Yesusia Adhintandhan Bayrosa Ergan Genta Gabreelin Giyono

²⁶ Elsaabeth ko sirmayseka laskoa arpeka ergangenta Gabreelidhan Galila peen Nazret hambhen gabandar, ²⁷ Dawit muldhara Yoseep hambhe kinin seeson angika wodhayse desmon dudin anzan naandar kidhan ki yitade. Naan ogosa namo Mariyam koda hambhe. ²⁸ Ergangental kokal na'ayse yini ki giyade, «Ya Bayrosa nashadhoono, nagaya hana ko dee; Bayro hambetene. Ya maanasa shaarinte goshpadhonone] »kona ki hamade. ²⁹ kodil kisa dhalqinka katti targadhayse, «Koro hatin doono nagaymakone?» hamayse ko qabade.

³⁰ Bayrosa ergangental yin ki giyade:- «Mariyam, Bayrosa birante goshipi hanin haapona pimhabhode. ³¹ Shedaa! Ya sirmada sirme; naasi angil adhada adhe; kisa nabindhan! Yesu hada hame. ³² Kidi eedi gari ki maate; kanka wulsa bashe Bayro Naasine koda hambhe. Imba Bayro kisa imba Dawitsa bitamon borkotondhan kina kida ime. ³³  Yayqoobsa muldhanadar rooro wulka lay kida bitime; kisa bitamonsal machi kisa qolee» kona ki hamade.

³⁴ Mariyam! ergangentana «Inta angika wodhayse inin dhesamona, ogoro hate ko yin dee?» kina ko hamade. ³⁵ Ergangental kona yin ki giyade:- «Gazan Uspino hadar na'a ko nee; wulsa bashe Bayrosa kantano hadar ko daade. Ogonaqante hagdira adhe Naasa gazane: Bayro naasi hamayse ki eelidhe.

³⁶ Shedaa! Hasa edano Elsaabeth! ta yisa geshamondar naasi angi kodi sirmidine; sekine hambhayno ko sirmaysaka koro kosa arpi laskone.

³⁷ Bayrodhan yer bashe qolee.» ³⁸ Mariyam! «inta Bayrona waadimaynone. Hanin giya uspe ina ki dee» ko hamade. Ergangental kokalanka ki ya'ade.

Mariyam Elsaabethdhan Shedana Konin Yioono

³⁹ Ogo wodanka Mariyam dhabhayse Yiwuda peente dhukandar doon gaban kalondar sana ko ya'ayse, ⁴⁰ Zakariyassa ooninte ardayse Elsaabethdhane ko nagaysade. ⁴¹ Elsaabeth! Mariyam! nagaysendhan konin qansenka, iinte kosa daa naasa katti ki curade; Elsaabeth! uspin gazanka ko thothade. ⁴² kodil uspin dhan dheg hayayse yin ko giyade:- «Yaa maana gidira goshipadhonone; hasa iinte daa naasal goshipadhane. ⁴³ Bitu gebhasa indano ikal hanin no'ono ina kati wozane. ⁴⁴ Shedaa! Hasa nagaymakon uspin inin qansenka isa iinte daa naasa wozanka ki curade. ⁴⁵ Bitu gebha hana giyono maata ko maate hamayse hanin tiyona, ya goshipadhonone.»

Mariyam Bayrona Kon Dhasoono Gadino

⁴⁶ Mariyam yin ko giyade:-

«isa sadano Bita gebhadhan koda goshepe;

⁴⁷ isa woynamol idhan Dhache Bayroka koda wozadhe.

⁴⁸ i ko likon bagadhondhan kidi hapidine.

Kara yedayse adhadhayna wul ya goshipadhono koda hame.

⁴⁹ Ogonal kantanka daa Bayro ina yer gari kinin hayona;
nabinol kisa carangine.

⁵⁰ Bayrodhan pimbhayna wulna
adhen buqora oo buqonadar yeka,
garondhan kida haye.

⁵¹ ynon aanka kantandhan dhoydine.
porimbhaynasa qabondhan tar haydine.

⁵² Peen wotisaynadhan kisa bitamora kidhan hanshidine;
yirk hamaynadhan dheg haydine.

⁵³ Daqardhanadhan yer payyaka michidine;
wodimadhan aan guuri ki yitade. ⁵⁴

garntondhan qabayse kina wadimayna Israel enadhan kidi kelshidine⁵⁵
ogorol wosa wonbanana gidhadisi Abraambee kisa muldhanabena
Roro wul lay deen kaalanane.»

ko hamade.

⁵⁶ Mariyam Elsaabeth ooninte arpi makanadha dorqayse yisa oonindar ko ya'ade.

Noqonka Shiye Wannisn Adhadhoono

⁵⁷ Elsaabethl adhiman arpe kosa yeskaysaka naasi angi ko adhade. ⁵⁸ Kosa gurdan eenabe eedanabe Bita gebha yisa garntondhan kona thothi kinin hayondhan qansayse kombete ki wozadhade. ⁵⁹ lankayso rooroka naasasa qamandhan taxana ki na'ade; imbaa nabinka Zakariyas hamayse kisa nabindhan wodana ki zagade. ⁶⁰ Indano «yin dee; nammo kisa Wannisne» kina ko hambhe. ⁶¹ kidil «Hasa eedanar nabee agaka eldha hayetel qolee» kona ki hamade.

⁶² imbadhan «naasa nabindhan hay hamayse ki elidhe ha nashe?» hamayse milkitika ki oysade. ⁶³ Zakariyasl aanika yera nabin thaape oysayse, «Kisa nammo wannisne» hamayse ki thaapade. wulate ki yershade. ⁶⁴ sanawa Zakariyasisa aponol ko bhoqaysaka Bayrodhan goshaate dhalqan ki yedade. ⁶⁵ ashina wulna pimbhe ko maatade. Ogoro yero wul Yiwuda peen dhukanka doon wul gidir ko dhalqadhade. ⁶⁶ Qansaana wul, «Ta naasa kaa hate hama naasi ki dee?» hamayse yisa woynaminka ki yedade; ogorol Bayrosa aano gon kimbete kinka konin doonane.

Zakariyas hamana Doondhan kinin giyoono

⁶⁷ naasasa imbaa Zakariyas manpas gazanka thothayse hamana doondhan yin ki giyade:-

⁶⁸ «Israelsa Bita gebha Bayro ki goshpadhe; na'ayse wodar doon bazandhan kashayse bulidine.

⁶⁹ yisa waadiman ea Dawitisa eedanara dhache kantadhan dhasidine;

⁷⁰ enara yedayse daana gazana Bayro kalanka qansayse eena giyayna eenasa aponka kinin giyondisi,

⁷¹ wodhan jibaynabee wosa banqin eenabe wulsa anira wodhan dhachidine.

⁷² Ogoro yin kinin hayono wosa wombanana garintondhan dhoyana carangin malintondhan qabintankane.

⁷³ ogo yisa malintondhan imbaa wosa Abraambete kinin ardono

⁷⁴ wodhan jibaynasa aanira dhaqayse pimbhe qolma kina wo waadimene. ⁷⁵

Sadanka wonin deen rooro wulka Bayrosa birante carangibee tipamobeka daan wo damene.

⁷⁶ Ta ya naasa kaa, wulsa bashe Bayro kalanka qansayse giyene hada hambhe.

goyndhan sana Bita debhasa birante hada yee.

⁷⁷ ogona kisa seesono kina ko shidhe hamayse Bayro kalanka kinin haapen dhaqintasa goyndhan kidhan hada dhetise.

⁷⁸ Bayro kalanka seesondhan kinin garenbee kisa lemakonbee dhaqintasa shakanbe cacira wona ko shaake ki hayse.

⁷⁹ Thipante daayse diyana doon een wulna kidi shaaka ki shaake; roondhan wosa nagaymakon goyndar kida ense»

ki hamade.

⁸⁰ Naasal gebhidine: Manpasinkal wochimbhidine. Israel eenana yinin haapadhen wodanka yeka darante ki kapade.

2

Yesus kiristosisa Adhintano

(Maa 1:18-25)

¹ Ogo wodanka Roome peensa bitaa kinin bitimon peen wul gidir doono eeno wul naabin konin thapadhodisi Bitaa Awgisthoos Qesar kirape ki kirapade.

² Qerenos Soria peendhan kinin wottisen wodanka, naabin thapadhayno koro bironone.

³ ogona zarsino wul yisa imbana peendar naabin thaspana ko ya'ade.

⁴ Yoseep Dawit muldhara kinin doona, Galila peen Nazret Gabara dhabhayse

Yiwuda peen Betelehemdar ki ya'ade: ⁵ thapadhana kinin yo'ono sirmayse doon kin seeson mariyambete kinkane.

⁶ Ogote ki daaka, kosa adhiman arpe ki yeskade. ⁷ ogote biraa naasadhan ko adhade. shooshinayn wodhen ooninte raqi kin hapamona, kidhan apalanka kicayse wangayn galan isen gongalante ko wotade.

Yanaa Gishaynabee Bayrosa ergangenabe

⁸ Peen ogosa torente sotinka Yaana gishate wodhayna eena ki daade.

⁹ igirakal Bayrosa ergangenta ki haapadhade; Bayrosa goshpin shaakanol kisa sukante ko shaakade; ogona kidi kati ki pimbhade. ¹⁰ ergangenta yin ki giyade:- «shedee! pimbhebhode! een wulna maate kati wozise uspi yena ida giye. ¹¹ ogorol kina Dawit gabante Dhache, kidil Kristoos hamibhe Bita gebha ki adhadhade. ¹² kidhan yenka dhesayno milkitino yine:- Naasadha apalaka kicayse wangayn galan iseen gongalante wotadhaysaka yeda haape.»

¹³ Ki dhesima gebhi Bayro cacira kinin nitana ergangena Bayrosa ergangentabete kinka haapadhayse, Bayrodhan goshpaate yin ki giyade:-

¹⁴ «Cacinte Bayrona goshpi ko dee;

payyamonol peendar Bayro nashimakonka kinin nashayna wulna ko dee.»

¹⁵ Bayrosa ergangena kikalanka edimayse cacindar kinin utonsa budobar, kidi Yaana gishayna eena kinka kikal «Betelehem ya'ayse Bayroyn wona giyon ko yerindhan wo shede» ki hamade. ¹⁶ sanawa ya'ayse Mariyambee, Yosepbe, wangayn galan iseen gongalante wotadhaysaka naasadhan ki haapade.

¹⁷ shedayse, naasa agasa kina gidhon yerindhan ki giyade. ¹⁸ ogodhan qansana wul Yaana gishaynayn kina kin giyon yerinka ko yershade.

¹⁹ Mariyam ogo yerin wuldhan yisa woynamika qabatebee kalatebe ko daade.

²⁰ Yaana gishayna kina gidhondisi, yinin qansonbee kinin haaponbe wulna Bayrodhan goshpaate goshpinka maatate ki ya'ade.

Naasa Yesusdhan Bayrosa Gazan Oonindar Ba'ate Yadhoono

²¹ Naasa adhadhaysaka kisa qaman taxadhen rooro lankay konin thothona, ko sirmima Bayrosa ergangenta kinin giyadisi, nabindhan Yesus hamayse ko eldhade.

²² Musesa giloonka caramakon wodan konin maqona Yosopbee Mariyambe, naasadhan Bita gabhasa birante thetana Yerusalemdar ba'ate ki ya'ade.

²³ ogorol kinin hayayno Bita gebhasa giloon mathapinte «birayse adhadha naasi angi wul Bita gebhana edimaa, carangi kida maate» hamayse thapadhondisine. ²⁴ ogodisi Bita gebhasa giloonka «Wale lika lama waginl purtal lama marsha mashadhe hayayse habee koda zaske» hamayse gidhonane.

²⁵ ogo wodanka Yerusalemir Simoon hambhe eedi kala ki daade. kidil sadandhan Bayrona imaa, eedi tipane, Israel yinka dhaqen goyn kalate ki

daade; Manpas Caranginol kidar ko daade. ²⁶ Bayron selaa Kristoosdhan hapima dembhi kinin dimondhan manpas carangino birayse kina giydine. ²⁷ ogo wodanka Manpas Carangino kidhan dhasaysaka, Bayrosa gazan oonindar ki ya'ade. Museyin bolon giloondhan kalaana, naasa Yesusdhan imbabee indanbe ba'ayse Bayrosa gazan ooninte ki ardade. ²⁸ Simoon naasadhan tiyate yidar lashi, hayayse Bayrodhan goshpaate yin ki giyade:-

²⁹ «Bita gebha Bayro,

ta keda hanin giyon uspidisi hasa waadiman eedhan nagayanka yitaa.

³⁰ hasa dhachintandhan aapinka inta haapidine. ³¹ ogorol een wulsa birante hanin hayonone.

³² kidil Ayiwday hama wulna shaake Israel zarsina goshpine.»

³³ Imbabee indanbe naasa Yesusisa gidhon yerin wulka ki yershimate.

³⁴ Simoonl kina Bayro eelayse indan Mariyamina yin ki giyade:- «sheda! ka naasaka Israel zarisinsa gembho kanka ko kaye; gembho eena dhaqosa goyte ki maate; kidil gembhon een kidan tiymona milkit ki maate. ³⁵ ogo gebhon zarisinsa woynaminte ashimon qabondhan may hayanane; hasal woynaminsa iinte qabono banqidisi ukayse koda sage.»


³⁶ ogo wodanka Aser zarsira Panuel naano Hana hambhayno Bayro kalanka qansayse eena giyayno ko daade. kodil kati geshidine: yesa geshobete kinka lee tobbha yinin dorqonsa budobar, geshe ko kalanka ki diyade; ³⁷ kodil eedi oydi kaysa apo oydi lee matenka yeka, kembhima qambhi maatayse miskatebee Qomatebe sootinbee roronbe Bayrosa gazan ooninsa irra kayee.

³⁸ ogo wodanka kodi kidar thedayse, Bayrodhan goshpate Yerusalemsa dhaqintan kalate daana wulna naasasa ko giyade.

³⁹ Bayrosa giloonka gidhon wuldhan kinin machonsa budonte, Yosoopbee Mariyambe naasadhan baayse Galila peensa kinin doon Nazret gabandar ki maatade.

⁴⁰ Naasal zaranka gebhate bhochinkal wochimbhate ki ya'ade; pakalmakonkal ki thothade. Bayrosa sunin imintono daran ko daade.

Yesus Bayrosa Gazan Ooninte Kinin Doono

⁴¹  Yesusisa imbabe indanbe leen leenka Pasika^a rooron goshpana Yerusalemdar ya'ate ki daade. ⁴² Yesus lee tabhi lama naasi ki daaka, Ayiwd eenasa dambinka giloon goshpana ki ya'ade. ⁴³ roorodhan yinin machonsa budonte kinin maatenka, naasa Yesus Yerusalem gidir ki shidhade; imbabee indanbe ogo kinin shidhondhan dhesaye. ⁴⁴ wonbete kinka ya'ate ki daade hamate rooro kala goyti ki ya'ade; ogora yisa edanabete yinin dhesayna eenakal kidhan ki zagade. ⁴⁵ yinin bashadhonsa budonte kidhan zagate Yerusalemdar ki maatade.

⁴⁶ rooro makansa budonte giloondhan dhetisaynasa sharinte dorqayse eena kalanka kinin qansenbee kidhanl kinin oysenka Bayrosa gazan ooninsa iinte ki

haapade. ⁴⁷ qansana wul kisa bochinkabee kisa masinkabe kati ki yershade.

⁴⁸ Imbabee indanbe kidhan kinin haapenka, ki yershimade. Indanol <<Isa naasa, harrna yin wodan haya? Imbee hambabe kati galate hadhan zagate wo daade>> kina ko hamade. ⁴⁹ kidil <<Harrne idhan zaga? Inta Imbasa ooninte daana idhan konin zaskendhan yedi dhesetenu?>> ki hamade. ⁵⁰ ko daanal kinin giyono kina ardaye.

⁵¹ Kinbete kinka dhabhayse Nazretdar ki ya'ade; imbabee indanbena ee hamate ki daade. indanol igira yera wuldhan yisa woynaminka yedayse ko daade. ⁵² Yesus pakalmakonkabee gebhintankabe, goshpinka Bayrobee eenbesa birante gebhate ki daade.

3

Noqonka Shiye Wannisin giyoono Bayrosa Uspino

Mat 3:1-12; Mar 1:1-18; Wan 1:19-28

¹ Roome peen bitaa Thibaroos Qesari bitimaysaka tabhi dongso le'enka, Bhenthenawi Bhilathoos Yiwuda peendhan wotise ki daade; Herodisil Galila peendhan wotise ki daade; ishime Pilbhosil Ithuryasbee Thirakondosbe peendhan wotise ki daade; Lisaniyosil Abilinis peendhan wotise ki daade.

² Hanabee Qayapabe gudul gari kinin doonka. ogo wodanka Zakarias naasa Wannis darante ki daaka, Bayrosa Qallo daran ko na'ade. ³ ogona Wannis Yordanos baynsa gasante doon peen wul gidir «Yesa seesonin gardhodisi, seeson waadimandhan garayse Bayrodar maatayse shiidhee» hamaate ki kerafe. ⁴ ogorol yin konin doono Bayro kalanka qansayse eena giye Isiyasin mathapinsa iinte:-

«Nanato! < Bita gebhana goyndhan ashkee.

goyna siyanadhan pishkee. ⁵ Qanana wul ki thothe; dukultanbee dhukanabe yirk ki hamee;

Wobona goynal gaz ki hame;

agamo goynol aga ko maate.

⁶ eeno wul Bayrosa dhachintandhan ko shede»

hamayse kerape easa usipno darante ko qansime»

hamayse kinin giyono ko maatade.

⁷ Shiidhana kalan na'ana Zarsinana, Wannis yin ki giyade:- «yedi qarshin na'ana, ne'en Bayrosa wacimera gobayse yenin dhaqodisi yena giyaa hayne?»

⁸ Ta keeda seesora maatintan aapin kee, Yesa woynaminkal <wodi Abraham naasine> hamayse poremebhode. Bayro kira seenara Abraamina naasi hayayse dhaasana dama ki dame. ⁹ taki Haaqandha taxate dhabayno Tesimbho haaqansa deminte wodadhidine, ogona payyan aapin ushimina haaqana wuldhan taxate nuunsa iinte koda dhabadhe.»

¹⁰ Zarsinol:- «taki har wo hayoo?» hamayse Wannisdhan ko oysade. ¹¹ kidil


«Apala lama yinsa daa kaladhan qolmana ki ime; gala yinsa daal agadisi ki haye» hamayse kina ki masade. ¹² Gibirin kachaynal kalan shiidhana na'ayse, « Tamarse, har wo haye wodhan ko zaskе?» hamayse kidhan ki oysade.

¹³ kidil «yena dambinte gidhora saskayse tiyebhode» kina ki hamade.

¹⁴ Polisanal na'ayse, «Wodisin keda har wo haye ko zaskе?» kemade. kidil «eensa koymondhan gidhora saskayse tiyebhode; hayeyatel budamonka bersebhode; yenin waadimona yena imbhayno koymono yena yeka ko yeeke» ki hamade.

¹⁵ ogo wodanka zarsinol wul Kiristosisa na'aytandhan wozanka kaalate kon doona; wannisdhan «Kaa ea Kiristos doo ki dew?» hamayse woynaminka ki qabade. ¹⁶ Wannisl ki wulna yin ki giyade:- «inta noqoka yedhan ida shiye; ko daanal igira kantanka sage na'a ki nee. inta kisa dungurinsa dhaxindhan bulana damatine. kidi Manpas gazankabee nuunka yedhan kida shiye.

¹⁷ gazgondhan qanayse kudhira aapindhan kinka bule angamo kisa aanintene. aapindhan payya ashikayse yisa dugente kida kee; kudhindhanl dikimon nuunte kida koqe.» ¹⁸ kidil abi kilima uspinka Bayrosa ushindhan zarsina giyate wongelindhan ki giyade .

¹⁹  galila peendhan wotise Herodosa ishima Pilibhosisa geshon Herodiyadhan kinin kemonabe kinin waadimon siyon waadiman wulna Wannisl kidhan ki wacimade. ²⁰ ogona Herodosa yinin waadimon siyon waadiman wul gidira saskayse, pir Wannisdhan dhaxin ooninte ki dhaskade.

Yesusin Shidhadhoono

Mat 3:13-17; Mar 1:9-11

²¹ een wulin shiidhimbaysaka budonte Yesusl ki shiidhimbhade. Bayrodhan kinin miskenka cacino ko bulimade, ²² Manpas Gazanol waledisi maatayse kidar ko hanshade. «in nashe naasa kane; hanka ida wozadhe» hame usip cacinte ko qansimad.

Yesusisa muldhana

Mat 1:1-17

²³ Yesus zarsindhan dhetisan kinin yedenka leendho kisa eedi kala kaysa apo tabhidhane. eena Yesus Yoosep naasi kida maate. Yesusisa eykena kirane.

²⁴ (38) Bayro naasa Adaam,
Adaam naasa Seet,

Seet naasa Henoos,

²⁵ (37) Henoos naasa Qaynan,

Qaynan naasa Malaliel,

Malaliel naasa Yared,

Yared naasa Henook,
Henook naasa Matusala,
²⁶ (36) Matusala naasa laame,
Laame naasa Nohe,
Nohe naasa Seem,
seem naasa Arpakisad,
Arpakisad naasa Qaynim,
²⁷ (35) Qaynim naasa Sheela,
Sheela naasa Ebeer,
Ebeer naasa Peleeq,
Peleeq naasa Ragau,
Ragau naasa Serug,
²⁸ (34) Serug naasa naakor,
Naakor naasa Taara,
Taara naasa Abraam,
Abraam naasa Yisaaq,
Yisaaq naasa Yayqoob,
²⁹ (33) Yayqoob naasa Yiwuda,
Yiwuda naasa Paarees,
Paarees naasa Hethron,
Hethron naasa Arni,
Arni naasa Raam,
Raam naasa Aminadab,
³⁰ (32) Aminadab naasa Naason,
Naason naasa Selemon,
Selemon naasa Booz,
Booz naasa Iyobed,
Iyobed naasa Isey,
³¹ Isey naasa Dawit,
Dawit naasa Naatan,
Naatan naasa Mathaat,
Mathaat naasa Maynaan,
Maynaan naasa Meliya,
³² (30) Meliya naasa Eliyaqem,
Eliyaqem naasa Yonaan,
Yonaan naasa Yoosep,
Yoosep naasa Yiwuda,
Yiwuda naasa Simoon,
³³ (29) Simoon naasa Lewi,
Lewi naasa Maathat,
Maathat naasa Yoraam,

Yoraam naasa Eleezar,
Eleezar naasa Yosee,
³⁴ (28) Yosee naasa Eer,
Eer naasa Elmodaam,
Elmodaam naasa Qosaam,
Qosaam naasa Yosaas, Yosaas Naasa Haadi,
Haadi naasa Milki,
³⁵ (27) Milki naasa Neeri,
Neeri naasa Selatiyal,
Selatiyal naasa Zerubabel,
Zerubabel naasa Rees,
Rees naasa Yonaan,
³⁶ (26) Yonaan naasa Yooda,
Yooda naasa Yoseep,
Yoseep naasa Semey,
Semey naasa Matatiyo,
Matatiyo naasa Ma'at,
³⁷ (25) Ma'at naasa Naage,
Naage naasa Eslim,
Eslim naasa Nahoom,
Nahoom naasa Amoth,
Amoth naasa Matatiyo,
³⁸ (23-24) Matatiyo naasa Yoseep,
Yoseep naasa Yoona,
Yoona naasa Milki,
Milki naasa Lewi,
Lewi naasa Maati,
Maati naasa Eeli,
Eeli naasa Yoseepne.

4

Yesusin Taysadhoono Mat 4:1-11; Mar. 1:12,13

¹ Yesu! Manpas Gazanka thothayse Yordaanos bayra kinin maatenka, Manpas Gazano darandar kidhan ensate ko ya'ade ² eedi lama kaysa rooro meshika ki Taysadhade. Roorona igiraka yer kala hattel esaye, kala hatel isima kapayse machinte daqardhidine.

³ meshil Yesu!na «Ya Bayro Naas ha daana, seene kadhan «Galaa maata» hama» ki hamade. ⁴ Yesu! «Eedi Galaa esayse bish dee, hamayse thaapadhidine» hamayse ki maasade.

⁵ Ogora meshi Yesusdhan dheg hama raqidar bulayse, peendar doon

bitamon wuldhan saanawa dhoyayse, ⁶ «yin ki giyade; betamonbee goshpinbe wuldhan ina imbidine, intal inin nashena inin imena; hana imayda ime.

⁷ Ogonaqante ya ina kumbursayse ha goodimidi hana, koro wul hanti koda maate» ki hamade. ⁸ Yesusl « Bita gebhana goodima, ki bishedhan goshpa: hamayse thaapadhidine» hamayse ki maasade.

⁹ Ta pir meshi Yesusdhan Yerusalemdar ensayse Bayrosa gazan ooninsa illindar woysayse kina yin ki giyade:-«yaa Bayro Naas hana, yinda kora mee bulaa.» ¹⁰

«Hadhan kin kaledisi Bayro yisa ergangenana giya ki giye; ¹¹

roon hanondhan seenin gincomadisi

aanaka kedha ki kedhe,

hamayse thapadhidine»ki hamade. ¹² Yesusl, « Bita gebhadhan taysabhode! hamayse thaapadhidine» hamayse ki maasade. ¹³ meshil taysintan wuldhan yinin machonsa budonte, pir aabi woda yin haapenka yeka ki kalanka ki pegimbhade.

Yesus Galila Peente Bayrosa Usipndhan dhetan Kinin Yedoono

Mat 4:12-17; Mar 1:14-15

¹⁴ Yesus Manpasin Gazansa kantanka thothayse Galila peendar ki maatade; kinin qayoono sukante doon peen wul gidir ko qansadhade. ¹⁵ kidil Ayiwd eenasa ooshin raqinte kidhan tamarsate ki daade; wulate kisa Timirtinka kidhan ko goshpade.

Nazret Gabante Yesusin tidhamo

Mat 13:53-58; Mar 6:1-6

¹⁶ Ogosa budonte Yesus yinin gebhon gaban Nazret dar ki ya'ade. lele gentadisi Bayrosa qaysin roonka Ayiwd eenasa ooshin raqinte ardayse; anbabana ki dhabhade. ¹⁷ Bayro kalanka qansayse giye Isiyas maathapin kina imbhaysaka maathapin kin bulenka yin giyayse thaapadha raqadhan ki haapade:-

¹⁸ «Bayrosa Manpasno idar ko daade;

qambhinana Bayrosa wongelin usipndhan

inin giyodisi kidi idhan selidine.

Dhaxadhanana bulin,

aapin kayanana ki shede i giye,

galensa iinte daanadhan

galera inin bulodisi, ¹⁹ nashimakondhan Bayrosa wodanin yeskondhan inin kerefodisi idhan ki nitade.»

²⁰ Yesus maathapindhan tupayse waadiman eena imayse ki doorqade. Ayiwd eenasa ooshin raqinte doono wul ki bishedhan koda shede. ²¹ kidil «Ta koro

Qaminka yenin qansono maathapinsa Qallo kina ko maqade » ki hamade. ²² kisa apora uten iminton qalira dhabhayse yershimate, «Kaa Yoseep nasatayu?» ko hamade.

²³ kidil, yin ki giyade:-«ya akimee, ta hadhan pacha, Qipirnahom gidir han hayondisi wonin qanson wul kotte hanon gabante pir haya hamen kansondhan idar ba'ayima garatene» ki hamade. ²⁴ pirl yin ki giyade gon ida giye:- Bayro kalanka qansayse eena giye peen yinonte goshpade. ²⁵ ko daanal yena gon ida giye:- Eelias wodanka lee makambee arpi laxbe dobinin qanamona peen wuldar kanta daqi ko daade; wodan ogoka, Israel peente gebhi angina yinsa diyana qambhina maana ki daade. ²⁶ Eeliasil Sidoona peente doon Serabhta gurdante doon qambhinkal kidhan ko yitadhade; Israel maana qambhinakal kidhan yitadhaye. ²⁷ Bayrokala qansayse eena giye Elsayi wodanka Israel peente genbho eeno bishin hajimon burqonka^b hajadhono ko daade; Soria peente Niiman bishene pashayse caranga, kisa gidira eedi abi ko daanal pashayse carangaye.

²⁸ Ayiwd eenasa ooshin raqinte daana wul ogodhan yin qansen kati ki wacimade. ²⁹ dhabhayse gabansa gasandar Yesusdhan yedate ki bulade; kidhan bolidante kupate dhabana zagayse yisa gaban kindar ashikon ashonsa asindar ki tiyade. ³⁰ Kidil kisa sharinka sagayse ki ya'ade.

Yesus meshindhan kinin buloono

³¹ Ogosa budonte Yesus Galilar doon Qipirnahom gabandar ki ya'ade. Ogote qaysin rooronka zarsindhan dhetisate ki daade. ³² kinin giyayno hayamonka konin doona kisa timirtindhan yershidine.

³³ Ayiwd eenasa ooshin raqinte meshinin yeda eedi kala ki daade. usipn dheg hayayse ilatate:- ³⁴ «Nazret Yesus, hakal wosa doono hare? wodhan kaysana na'a? ya Bayrosa carange hanin doondhan inta dhesidine!» ³⁵ Yesusl meshinka, «Lay hamayse eara utaa!» hamayse kidhan ki bitade. meshil eensa birante eedhan dhabayse yer kalal kidar yeskisima kalanka ki utade.

³⁶ eeno wulate yershayse kinka kikal «koro kinin giyayno har timirtine? hayamonbee yisa kantankabe meshina kinin giyenka kidil ee hamayse uta ki ute» hamayse ko dhalqade. ³⁷ Yesusin yershadhoono gasante doon peen wulgidir ko qansadhade.

Hajimonka doon Eendhan Yesusin Pachoono

Mat 8:14-17; Mar 1:29-34

³⁸ Ayiwd eenasa ooshin raqira utayse Simoon ooninte ki ardade. Simoonsa baysino kati bishin oche hajimoka wodhayse ko daade, konaqantel Ysusedhan ki miskade. ³⁹ Kokal thezi woyayse bishin ocendhan ki bitade. Bishin ochaynol kodhan ko garade; kodil sanawa dhabhayse ko waadimade.

⁴⁰ Hayn weenka wana wana burqenin yedana wuldhan kalan ko badhade;

kidil kala kalanadar aanin wodayse kidhan ki pachade. ⁴¹ meshinal pir «Ya Bayro Naasine» hamayse ilatayse gebhon earaa ko utade. Kiristos kinin doondhan kinin dhesona yer kalal kinin giyomadisi kidhan ki bitade.

Yesus gelila gedir kinin tamarsoono

Mat 4:23-25 Mar 1:35-39

⁴² Peen sedhaysaka, utayse gasa raqidar ki ya'ade. Eenol kidhan zagate kikal ko na'ade; kikalanka dabhate kinin yo'omadisi kidhan marana ko zagade. ⁴³ Kidil «Wani gabante doon eena wozisen Bayro bitamonsa wongelndhan igiye idhan koda zask» ina nitadhono ogonane kina ki hamade. ⁴⁴ Ayiwd eenasa ooshon raqin wul gidir ^c giyte ki daade.

5

Tamara biranadhan Yesusin Eelono

Mat 4:18-22; Mar 1:16-20

¹ Zarsinol Bayrosa Qallindhan qansate kinka chijimate ko daaka, Yesus Gensareth bazinsa gasante woyayse ki daade, ² ogo wodanka gongala lama bazinsa gasante woyaysaka ki haapade, kaaran yedaynal gongalara hanshayse zanadhan shiyate ki daade. ³ Gongalasa sharira simoon gongalandar ardayse peera lika susi ki haye ki miskade, agara gongalansa iinte doorqayse zarsindhan tamarsate ki daade.

⁴ dhalqindhan machayse simondhan «susi theerin noqondar piki hayse kaaran yedana zanadhan dhabee» ki hamade. ⁵ Simoonl masayse«tamarse sootin wul bashadhayse wo wodhade kalahatel yedotone hanin giyona qallinka zanadhan dabayda daabe»ki hamade. ⁶ Yin kinin hayenka kati gebhi kaara ki yedade; zanol takiman ko yedade. ⁷ gongalan waate daana anamadhan na'ayse kidhan ki kelishe aanka ki eelade kidil na'ayse lamana gongaladhan kaaranka ki thosade,gongalal Izaqadhan ki yedadhade.

⁸ simoon bethiros ogodhan yinin hapenka, yesusa buqondar bhaqayse « Bita gebha inta seeso eedine ikalanka pegimbha » ki hamade. ⁹ ogodhan yin kinin giyono kinbee kimbete kinka daana kinin yedoon kaaransa thothamonsa kinin shawukonane. ¹⁰ peerl simoonsa anamo maatana Zabdoos nana Yayqoobee wannisbe ki shawukade. yesusl simoondhan« pimbhabode keeda eendhan qaze hadamate » ki hamade. ¹¹ Kidil gongaladhan peendar yeskisayse wuldhan garayse kisa panante ki ya'ade.

Bishin Hajimonka Daa Eadhan Yesusin pachoono

Mat 8:1-4; Mar 1:40-45

¹² Yesus gabaa kala gidir kinin doon wodanka eedi kala bishin hajimonin

^d kati yeda ogo gabante ki daade, aga ea Yesusdhan yinin haapen, wodanka birante dambayse, «Bitu gebha, haa nashidihana, pachayse caringisana damada dame» hamayse ki miskade. ¹³ Yesusl aanindhan kidar pishikayse linsate, « nashayda nashe, pashayse caranga» ki hamade. Sanawal bishin hajimono ko kayade.

¹⁴ Yesusl «kodhan haynal giyabhode ko daanal ya'ayse gudulana dhoya; pashayse hanin carangono tarja ko maate Museyn giyon marshandhan thetaa » hamayse ki giyade.

¹⁵ ko daanal kisa dhalqadhayno dhalqino kati gebhate ko ya'ade, kati gembho eenol kinin giyendhan qansanabee yinka doon burqora pashana pucate ko daade. ¹⁶ kidil rooro wul yimal pee gasadar ya'ayse miskate ki daade.

Yesus Arisa Eadhan kinin Pachoono

Mat 9:1-8; Mar 2:1-12

¹⁷ rooro kala tamarsate ki daade, Galilabee yiwudabe gurdanaral wul, yerusalma na'ayse daana parasawiynabee giloondhan tamarsaynabe dorqayse ki daade, kidil ki pache, Bitu gebhasa kantano kimbete kinka ko daade. ¹⁸ wodan ogoka eeno eedi arisi kala shalanka ba'ate ko na'ade; Yesusisa birante wodana oonindar arsana ki zagade. ¹⁹ Zarsinsa thothomora dhabayse ooninsa iinte arsana yin damamona ilindhan kotayse hajimon gentadhan shalanka zarsinsa bakinte Yesusisa birante ki hanshade.

²⁰ Yesusl kinin amanondhan haapayse «ya ea seesono hasa gardhidine» ki hamade. ²¹ Thapinabee persawiyani eenabe « ka Bayrodhan iirime hayne? kala Bayro bishera seesondhan garsana damee hayne?» hamate ki qabade.

²² Yesusl kisa qabondhan dhesayse yin ki giyade« harne woynaminka yin qabaa? ²³ «Seesono Hasa gardhidine» hambhebe «Dhabhayse ya'a» hambhebesa hamane dheepa? ²⁴ ko daanal peendar seeson shishana eedi naasina hayamo konin doondhan yedhese ko zazike hamayse, arsa eedhan «hana ida giye:- dhabayse shalandhan ba'ayse oonindar ya'a»ki hamade.

²⁵ kidil sanawa dhabhayse eenasa birante ki woyade, wodhayse yindar doon shalandhan basikayse Bayrodhan goshpaate oonindar ki ya'ade.

²⁶ ogote daana eena wul kati yershayse Bayrodhan goshpaate« kina yer tarshe wo haapade» hamayse ki pimbhade.

Lewi Hambhe Eadhan Yesusin Eldoono

Mat 9:9-13; Mar 2:13-17

²⁷ ogosa budonte Yesus ogora utayse kinin ye'enka Lewi^e hambadhe kala gibirin kache gibirin kinin kachen raqinte doorqayse ki daysaka haapayse, «isa panante na'aa» ki hamade. ²⁸ kidil wuldhan garayse dhabhate panante ki

ya'ade.

²⁹ Lewi Yesusna ooninte gala ki ashkade, gebhi gibirin kachayabee waani eenbe kimbete kinka kumana dorqayse ko daade. ³⁰ Parasawiyān eenabee thaapenabee gibirn kachaynabe «seeson genabete kumate yenin wuchayno harnane?» hamate tamaradar ki gundimade. ³¹ Yesusl yin giyayse ki masade, «Hajimonka daananane; payyanana akimi zasikeye. ³² intal seeson eenadhan seesora masanane; charaginadhan eelana na'atine.»

Isima Qomadhen Goynsa Yesusen Oysadhoono

³³ kidil «wannisa tamara rooro wul qomayse kida misike; parasawiyān tamaral agadisi ki haye; hana tamara rooro wul kina kumayno kina wuchayno harnane?» ki hamade. ³⁴ Yesusl yin ki giyade:- «Utaa kimbete kinka ki daaka, gaydhon na'ana ki qoome haye hayo? ³⁵ ko daanal utanin kalanka tidhayno wodano na'a ko nee; ogo wodanka kida qoome.»

³⁶ pirl yesus kansika yin ki giyade:- «Apala halindhan hattayse apala gechodar jage hayatel qolee. yin haydi kena, apala haledhan ki hate; hale jagadha gechobete kidar agee. ³⁷ Halin woyinin ziyandhan gechon Suruban gidir kayse wode, hayatel qolee; yin haydi kena hallo woynin ziyano surubandhan dhanqaysa ko dhanqayse; woyinin ziyanol lalima ko lalime; surubanol siya ko siyee. ³⁸ ogona halin woyinin ziyān halin surubante koda kadhe. ³⁹ keda gechon woyinin ziyandhan wuchayse halin zagee hayatel qolee; harna hambhidina <gechono dhepine> kida hamee. »

6



ukunse Roorosa Bitaa

¹ qaysin rooro kalaka yesus haminsa gidinka sagate ki daade, Tamaral tishandhan sharshayse aaninka shakimate gaate ki daade. ² Parasawiyān gidira kala kalana « qaysin rooronka haya hambamon harena ki hayee? » ki hamade. ³ Yesusl yin giyayse ki masade:- « Dawit kinin daqardhon wodanka kinbete kinka daana eenabete kinin hayondhan anbabetenu? ⁴ Bayro oonindar ardayse gudulana bishi hambhon galandhan tiyayse ki isade, yinka daananal ki imade. ⁵ pirl eedi naasi qaysin rooronsa Bitine» ki hamade.

Aaninsa ayilaa Eedhan Yesusin Pachoono

mat 12:9-14 Marq 3:1-6

⁶ qaysin rooro abika Ayiwd eenasa ooshin raqinte ardayse tamarsate ki daade. ogotel aanta mizaqaysa ayilaa eedi kala ki daade. ⁷ Thaapenabee parasawiyān eenabee bersana goyte zagayse, «ukunse rooronka pacha ki pachimo » hamayse kalate ki daade. ⁸ kidil qabondhan dhesayse aaninsa

aylaa eedhan «dhabhayse sharinte woya!» ki hamade. kidil dhabhayse woydine. ⁹ Yesusl yer kala yedhan ida oyse :- «qaysin rooronka giydhono payya hayamo seeso waadimamo? sada dhachintamo kaysintawu?» ki hamade. ¹⁰ pirl Yesus ean wuldhan yinin shedonsa budonte eadhan «aanindhan pishika!» ki hamade; eal kinin giyadisi ki hayade; aanol machi pashidine.

¹¹ Musesa gilondhan dhetsaynabee Parasawiyen eenabe ogoka kati wacimayse, «hatee kidhan wo hayana wona qante ko paydhe?» hamayse kinka kikal ki dhalqade.

Yesus Tabhi Lamana Tarjinadhan Yitana Kinin Kamoono

Mat 10:1-4 Mar 3:13-19

¹² rooro kala Yesus miskana dukandar ki utade, sootin wul Bayrodar misikate ki wodhade. ¹³ ko sedhaysaka tamaradhan eelayse kalanka tabhe lamandhan ki kamade; igiradhan «ergan gena» hamayse nabi ki wodade. ¹⁴ kidil bhethiros hamayse naabi kininsa woda Simoonbee, imba naasa Indirayasbee, Yayqoobee, Wannisbee, Pilbhoosbee, Bartemoosbee, ¹⁵ Maatosbee, Toomasebee, Ilpoos naasa Yayqoobee, peen yinona qaabe Simoonbee, ¹⁶ Yayqoob naasa Yiwadabee, pir yesusdhan saskayse imee Asqoronto Yiwadabene.

Yesus thoothin zarsindhan Kinin Tamarsonbee Kinin Pachonbe

Mat 4:23-25

¹⁷ Yesus igira tabhi lamaanabete kinka dhukara hanshayse torente ki woyade; Tamarasal gembho eeno ogote ko daade. takil kisa dhalqindhan qansayse yisa hajimora paashana zagayse na'ana kati kanta zarsine. kidil kingidira no'ono Yiwuda peen wulbee, Yerusaalem gabanabee bazinsa aponte doono Thiroosbee Sidoonaberane. ¹⁸ sigirmeshin yedaysaka gaalate daana eena na'ayse pashate ki daade. ¹⁹ Pachansa kantano kikalanka utayse ki wuldhan pachate konin doona, zarseno wul Yesusdhan lazana zagate ko daade.

Wozabee Eepibe

Mat 5:1-12

²⁰ Yesusl yisa Tamaradhan shedayse yin ki giyade:-

«yedi qambhina, Bayrosa bitamono yenti konin doona wozadhee;

²¹ yedi taki daqardhayna, bere yenin mishena wozadhee;

yedi taki eepayna, bere yenin hanchena wozadhee.

²² I eedi Naasina hamayse eeno yedhan konin jibbenkabee, yisa bakira konin edenkabee, konin iirenkabe, yesa nabindhan konin sesenka, wozadhee.

²³ shede! yena kashadhayno cacinte gari konin doona, ogo wodana wozadhate, kirbee. birana yembana Bayro kalanka qansayse eena giyaynadhan! agaadisi haydine.

²⁴ yedi wodima, hay! lenshintondhan taki yedi haapidine.

²⁵ yedi taki mishana, hay! ber daqardheda daqardhe.

yedi taki hancayna, hay! ber guman diyayse epeeda epee.

²⁶ eeno wul yedhan shawkate payyamon yesa konin giyenka hay!

«buudamonka wodi Bayro kalanka qansayse eena giyaynane» hamayna eena kisa imbanal yin ki hayade» ki hamade.

Wodhan Jibaynadhan Nashinta

Mat 5:38-48; 7:12

²⁷ ko daanal yee qansaynana yin ida giye, «yedhan jibaynadhan eenadhan nashee, yedhan jibaynana yer payya hayee.» ²⁸ yedhan ashaynana paathi imee; yedhan sesaynana miskee. ²⁹ karcaa kaladhan ceena karcaa wadhan dhoya; hasa apala daaton sarate tiyena apalan qadhin marabhode.

³⁰ miskimayna wulna imaa; koymon hasa tiyadhan ki maase kidhan oysaabhode. ³¹ eeno yena kohaye yenzagedisi yedil agaadisi hayee.

³² « nashaynadhan ye nashediyina har goshpe ko dheer? Seeson gena pir nashaynadhan keda nashe. ³³ payya hayaynana payya ye haydiyina har goshpe ko dee? seeson genal pir agaadisi keda haye. ³⁴ talqa masa ki mase yen hamaynana talqydi yina har wana goshipe yehaape? Seeson genal yin taliqondhan masate tiyana seeson genanal talqa ki talqe.

³⁵ ko dnaal yedhan jibanadhan nashee; payya kina hayee masate tiyana sholo quntima talqe; ogona goshpino kati gare koda dee; wulsa bashi Bayro naana yida maate; harna hambhedihana. kidi goshpiminabe cubon genanal payyane. ³⁶ imbaa yente burqadhe kinin dona yedil burqadhayna matee.

Eedidar Pirda Zaskimoono

³⁷ «Paradebhode yedarl paradhade, Sesondhan paydebhode, yesal sesondhan paydhadhee. garee; yenal gardha ko gardhee.

³⁸ «imee; yenal imbha ko imbhe. yenka kaaka maasate yenal kadha ko kadhe, payya ubhate jugayse lalisate thosayse Imbha ko Imbhe.»

³⁹ pirl kansika yin ki giyade; aapi kayaa aapin kayadhan ensana damawu? lamana kinka bodante dhamayu? ⁴⁰ tamara tamarsera bashe, ko daanal payya tamaraa ea wul tamarsedisi ki dee.

⁴¹ «hanon aapinte doon haaqandhan shedima, ha aanantasa aapinte doon kathandhan harnaa shede? ⁴² hasa aapinsa iinte doon haaqandhan shedima ha aanantasa; aapinsa iinte doon kathandhan i bule haman hataa damee? yaa maltee, birayse hasa aapinsa iinte doon haaqandhan bulaa, agara keda ha aanantasa aapinte doon kathandhan bulana payya hayayse shedada shede.

Haaqa Yisa Aapinka konin dhesimayno

Mat 7:16-20; 12:33-35

⁴³ «Haaqa Paya dayse siya aapi kee qolee; tapir siya haaqa dayse payya aapi kee qolee. ⁴⁴ haaqa wul yisa aapinka ko dhesadhe. ukumbhara shaapisa aapi kambhe; ukubha haaqara hwoynisa aapi kambhe. ⁴⁵ eedi payya woynaminte thoothayse doon yerin payyara yer payyadhan ki giye; eedi siyaa woynaminte thoothayse doon yerin siyora yer siyadhan ki giye. eedi woynaminte thoothoyse shidhora aponka ki giye.

Oona Lamanasa Kansino

Mat 7:24-27

⁴⁶ «inin giyendhan hayatene, Ta keda «Bita gebha Bita gebha!» harne hame? ⁴⁷ idar nee; isa Qalindhan qansayse haye wul haydhan kinin taxendhan I dhoye; ⁴⁸ Oonin yinin woysenka thersayse koya laytandar woysa eedhan ko taxe; miro na'ayse oonin ogodhan ko kupade, laytandar konin woysadhona jugana damaye. ⁴⁹ isa Qalindhan qansayse hayma, Ollo koyma peendar woysa eedi ki taxe, miro na'ayse t Oonindhan konin kupen wodanka sanawa ko dhamade, dhamintanol kati siyane.»

7

ukinse 7

Mato alaqasa Imintno

(Mat 8:5-13)

¹ Yesus ko wuldhan zarsinsa birante giyayse kinin machonsa budonte qipirnahom shete ki ya'ade. ^f ² ogotel room peensa gebha Mato alaqasa kala ki daade. kati kin nashe kisa worsho hajadhayse diyana sanayse ki daade. ³ yesusisa yinin qansen wodanka «ayiwid donzandhan daran yitayse; na'ayse isa worshodhan ki dhache ki miskade.» ⁴ ergan genal Yesusidar yinin no'on wodanka; yin giyayse kati ki miskade, «kodhan eena ha haye ko zaske. ⁵ harna hambhidihana, ka ea wosa Zarsndhan nasha ki nashe, ayiwidi eenasa oshin oonin ashika kidine.» ⁶ Yesusil kembete kinka ki ya'ade. kidil oonindan kinin theeden wodanka; Mato Alaqasa; anamadhan yitayse yin ki giyade; «Bita gebha; isa ooninsa iinte ha arde inta eedi zaskete; ikal na;ate qajadhabhode. ⁷ ogona hanon birante thedana zaska ko zaske hamayse idhan paydatne. komal «Qali kala giya,» isa worsho ee pasha ki pashe. ⁸ inta isa babar hama gar daydine; choobar ee hamayna polisana daane kaladhan «ya'a! »emaa yaa ki yee wadhank naa! »ema naa ki nee worshodhan! kadhan haya hambhadhana haya ki haye.»

⁹ yesusil kodhan yinin qansenka kidhan yirshayse, wal hamayse panante

ya'ate done zarsina«ida giye yin daa gari amanisa daa eedi israel gidira hapatne!» ki hamade. ¹⁰ yitadhana eenal oonindar kinin maton wodanka worshol pashaysaka ki haapade.

Yesus Maan Qambhinsa Nasadhan Dinbhira Kinin Dhasono

¹¹ agara pir yesus gebhi kaapima Nayn hambhen gabandar ki ya'ade; tamarabe gebho Zarsinol kimbete ko ya'ade. ¹² gabandar ardhadhen kern konin yesikenka ! eenol eedi diyasa leesi ba'ayse gabara ko utade; diyal naasa indansa kala bishine, kodil aanginsa diya maa qambhine. gebho gaban zarsino kombete kinika ko daade. ¹³ Bita gebha kodhan kinin shedon wodanka kona burqadhayse « darsha epabhode» kona ki hamade. ¹⁴ theedayse, kininka badhon haaqandhan ki lazade, ba'ayse ya'ayna eenal tip hamayse ko woyade, yesus! «ya barsha dhabha Ida hame!» ki hamade. ¹⁵ diyaa eel dheg hamayse dorqayse dhalqan ki yedade, yesus tiyayse indana ki Imade.

¹⁶ wul pimakonte ardayse Bayrodhan goshipate« Bayro kalanka qanse wosa bakinte dhabidine,» Bayro zarsndhan dhachana na'aydine ko hamade.

¹⁷ ogorol yesusisa waadimano yiwudabee gasante doon peen wul gidirbe ko qansimade.

Yesusbee Noqonka Shye Wannsibe

Mat 11:2-19

¹⁸ Wannsisa panante ya'aynal ogo wuldhan wansina ki giyade, kidil kisa bakira lamadhan eelayse; ¹⁹ «Na'a ki ne'e hambhadhe yaw? moo abi wo kaloo hamayse kidhan oyse» hamayse Yesusdar kidhan ki yitade.

²⁰ eenal Yesuskal na'ayse, «Shye wannsi na'a ki ne'e » hambhadhe yaw? moo abi wo kaloo?» hamayse hadar wodhan ki nitade ki hamade.

²¹ ogo wodanka Yesus gebhi eendhan Hajimorabe burqorabe; meshral ki pachade; gebhi aapin kayanasal aapin pachidine. ²² Wannsi kalanka nitadhaysaka na'anana «ya'ayse yenin haponbee yenin qansonbe wannsina giyee; aapin» kayana sheda ki shede; Arisna yaya ki yaye; bishin hajimonka daana pashayse carangidine; qansminal qansdine; diyanal dhabhidine; Qambinana wongalo gidha ko gidhe. ²³ inka qathimama eedi wul goshipadhane ki hamade» hamayse giyee» ki hamade.

²⁴ Wannsisa ergangena ki ya'aysaka budobar Yesus zarsina wannsisa yin giyan ki yedade;« Hay Peendar yena utono har shedanane? gibaryn jugen Warn? shedanamoo haar shedanane? ²⁵ ta har shedan yeutaa? apalan gobin qayon qadha eedhanu? apalan qaylin qadhanabe yina agaysaka daana binaa oonte ki daade. ²⁶ moo har shedanaye utaa? Bayro kalanka qansayse giyedhenu? gon ida giyee Bayro kalanka qansayse giyera saginee. ²⁷ «shedee! goyndhan Hasa birant see isa ergangentadhan hasa birante yitaydaytee» hamayse thaapadhono korone. ²⁸ yena ida giye:- maana kalanka

adhadhanasa bakira noqonka shye wannsis kalanka sagi haytel qolee; ko daanal Bayro bitamonsa iinte lika maate saga ki sage.»

²⁹ ogodhan yin qanson wodanka zarsino wul Gibirn puchaynal shidhima noqonka shye Wannsisa aaninte yin shidhona Bayrosa waadimano gon konin doondhan ko dhesade. ³⁰ Parasawiyabee dabinsa garabe, «wannsisa aaninte» kin shidhimbamona bayro kina kin giyon qabondhan tiyaye.

³¹ keda ta wodanka adhadhon eendhan harka ipansoo? haydhan kida taxe? ³² Gaban raqinte dorqayse kinka kidhan yin hamayna naanadhan kida taxe «woysa wo pugade kirbitene; zilma wo zilimade eepetene» ki hame. ³³ Shye Wannsi gala kumima Ziya wochma kinin no'ona meshi daane ye hamade; ³⁴ eedi naas pir kumatebee wucatebe ki na'ayna, Isebee wucebe gibirn puchaynabe seeson genasa eedane yehamede. ³⁵ keeda pakalmakosa gonamondhan kisa naason wuldar ko dhesadhade.

Maa Kala Yesussidhan Gamirenka Konin Qadhoono

³⁶ agasa budubar Parasawiyansa kala kimbete ki kumee, Yesusdhan ki eelade, kidil parasawiye ooninte ya'ayse Kumandar ki dorqade. ³⁷ ogo Gabante doono Maa kallo seeson geno Yesus Parasawye ooninte Kumandar kinin Dorqon yin Qanson Wodanka Alibatiros bilqatka gamiren ba'ate ko na'ade; ³⁸ kisa budobar roon deminte woyayse; eepate roondhan ermatnka chashipate ko daade; kisa roondhan yisa sitinka qadhate; roondhanl sunqate gamirenka qadhate ko daade.

³⁹ eelaa parasawiye kodhan kinin haapen wodanka« ea kaa Bayro kalanka qanse yidana lazono maa hay konin dondhan pirl har eedi konin dondhan dhesa ki dhese» seeso gentne hamayse woynaminka ki qaabade. ⁴⁰ Yesusl «Simoon, yer inin giyee daane, » ki hamade. Kidil «Dhetise, giyaa» ki hamade. ⁴¹ Yesusl yin ki giyade« eedi lama koymon talqe eakal koymo talqana ki daade, kala mato dongi birre lansol per bondi dongi birre daran daade. Eedi kalaakal eedi lamaa birre talqaana ki dahade. ⁴² yinin kashen dhulsanana bazandhan lamanana ki garade, keda lamanasa talqan talqanasa bashe kidhan nashe hamane?» ⁴³ Simoonl «gebhi bazan yinsa gardha dayma gare.» hamayse ki masade. Yesusl «gon yaa gidine » ki hamade. ⁴⁴ esondar wal hamayse Simoona yin ki giyade:- « ko esondhan sheda shedo? inta hanon oonindar i ardade, ya isa roona noqo hatel ba'atane; kodi roondhan yisa ermatnka chichate isa sitnka ko qodade. ⁴⁵ ya idhan sunqatane; kodi inin ardorra yedayse roondhan sunqan garaye. ⁴⁶ ya isa metendhan woyran Zaytinka qadhatane; kodi roondhan gamirenka ko qadhade. ⁴⁷ ogona ida giye:- kati konin nashona, gembho seeson kona gardhidine; lika yinsa gardha kinin nashayno likane.»

⁴⁸ Yesusl esoona « seesono hana gardhidine. » ki hamade. ⁴⁹ kimbete kinka kumandar dorqayse daana shoshenal,« kaa seesondhan garse kidi hayne?»

hamayse kinka kikal ki dhalqade. ⁵⁰ Yesusl esoona «hanin amanono hadhan pachidine nagayanka yaa» ki hamade.

8

Bhentan Yithesa Kansino

¹ agasa budobar Yesus Bayrosa Bitamon Ooninsa Wozisen giyaate Gabanabee gurdanabedar ki sagade. Tabhi lamanal kinbete kinka ki daade; ² Siyon meshinkabe hajimorabe pashayse daana kala kalana maana igiral tobha meshi yingidira utana megdelawit hambayno mariyam, ³ Herodis oonin wotise kuza geshon yohnabee soosinabe wanl gembho ko daade igira maana Yesusbe tamarabedhan yesa koymonka kidhan kelishate ki daade.

⁴ gebho zarsino kinka bukayse ko daaka pirl eeno wana wana gabanara daran konin neenka kona kansinka yin ki giyade, ⁵ «Kala hamin koyee bhentan yithana ki utade kinin yithenka kala kala bhentano goynsa aponte ko wa'ade roonkal ko tigadhade cacin atinal ki kamade. ⁶ wanni wanni bhentano senin raqindar ko dhamade; baqalayse gamat kon qolmona woshidine. ⁷ Waani bhentanol ukumbhansa bakint ko dhamade; ukumbhanol kombete kinka konin gebhona cuqayse ko shishade. ⁸ Waani bhentano payyan peendar ko dhamade kin baqalen wadanka eedi dhongi kaysasa bashi Aapi ko ushade. kadhan giyayse yinin machenka ushindhan dheg hayayse « qanse qamiynsa daa ki qanse» ki hamade.

⁹ tamaral ko kansinsa bulindhan ki oysade. ¹⁰ kidil yin ki giyade«Bayrosa bitamon ooninsa ashino yedhese yena imbhadhidine waanina kansinka ida giye ogorol shedate kinin hapimona qansatel kinin bhochimone.,

¹¹ « keeda Kansinsa bulino yinne:- bheeta hambhayno Bayrosa qaloone.

¹² goynsa aponte dhamana qalin qansaynane konal amanayse pashan ki gare meshi na'ayse qalindhan kisa woynamra kinsa tiyaynane. ¹³ seenin raqndar dhamanal qalin qansayse wozanka tiyaynane,kira likaa wodana ki amane; kodaanal caacin qolmona galen wodanka sanawa garaynane. ¹⁴ ukumbhansa bakente dhamana qalindhan qansaynane igiral dayse wodhayse peen kosa dayntan qabnka wodimakonbe mishimakon wozanka cuqadhaysaka zasken aapin ushee. ¹⁵ payyan peendar dhamanal qalindhan payyamonkabe tip hamon woynamnk qansayse kalayna wocimayse donshayse kapayse aapin ushaynane.»

Dheg hamadar doono Shakano

mat 4:21-25

¹⁶ shakandhan shashkayse daansa iinte waginl algansa linte wode hayatel qole ko ddanal oonindar ardayna shakandhan ki hapee dheg hayayse koda wodadhe. ¹⁷ may matima ashadha dhesadhima shakandar utima ashadhe yer

qole. ¹⁸ keda hate yenin qansendhan yedhan gishee; yinsa daana imbha ko imbhe; yinsa qolma kalanka daana wul tidha ko tidhe.

Yesussa Indanbee Imba Nanabe

Mat 12:46-50; Mar 3:31-35

¹⁹ agasa budobar Yesussa indanbee Imba nanabe kin doon raqindar ki na'ade, kidil Zarsinsa thothamora dhabayse daran theezana damaye.

²⁰ wodan ogoka; «handabee hambananabe hadhan shedana zagayse mayante woydine» ki hamade. ²¹ kidil« masayse indabee isa imba nanabe Bayrosa qalindhan qansayse hayaynane» ki hamade.

Yesus saylendhan cak kin hayoono

mat 8:23-27; ma 4:35-41

²² rooro kalaa Yesus tamarabete kinka gongolandar ardayse; «Bazinsa saabar wo sage» ki hamade; agara ya'an ki yidaa. ²³ yaate ki daakal Yesus raat kidhan yidaysaka ratedine: ogo wodanka Bazindar Sayle dhabhayse; noqonl gongolansa iinte konin ardoona gaale daran ko yeskade. ²⁴ Tamaral Thezayse ,«Bita gebha, Bita gebha, wodi kayoobhe!» hamate kidhan ki qansade. kidil, qaymayse wuranbee tuburen noqonbedhan ki bitade ogo wodanka woranbee tuburen noqonbe caki ko hamade. ²⁵ kidil tamaradhan« yinin amanono hamote ko daa?» ki hamade. kidil pimbhatebee yirshatebe «kaa woranbee tubhuren noqonbedhan ki bite; kidil ee kina hame kaa haynee?» kikal ki hamade.

Meshinin Yedaa Ea kinin Pashoono

8:28-34; mar 5:1-20

²⁶ agasa budobar Galilasa bazinsa saabar doon Gerasenonin^h peendar gongolanka ki sagade. ²⁷ Yesus gongolara peendar kinin hanshenka gabara utayse ne'e meshinka yedadha eadar ki kerade; kaa ea gebhi wodaka apala qadhima ooni gidir dayma duukin raqindhan ooni hayayse daan ki daade. ²⁸ Yesudhanl yin haapen wodanka, ilatate kisa birante damayse dheg hamaa uspika «wulsa bashe Bayrosa Naasa Yesus, ikal hasa doono hare? idhan galshabode; hamayse hadhan ida miske » ki hamade. ²⁹ Meshl ogo yin kina giyono ea gidra ki ute Yesus kidhan kin bitonane. meshl rooro wul kisa ki dhabhina ea sanseltenkabee roon zawonkabe dhxahte kaldhakal yinka dhaxahodhon sanseleten takayse daran daa meshi daraan peendar ensate ki ye'ee.

³⁰ Yesusl «Hasa namo hayne?» hamayse ki oysade. kidil gebhi meshi eadar ardayse kon doona « wodi Legeone» ki hamade. ³¹ meshnal «wodhan theerin oolondar yitabhode» hamayse Yesudhan kati ki miskade. ³² raqin ogote

dhukansa demendar gebhi wurgubana ki daade, meshinal «Wurgubanasa iinte wo arde» hamayse kidan ki miskade. kidil kanka aride kina ki hamade.

³³ mishnal eagidira utayse wurgubandar ki ardade; wurgubanal getinsa apora gurma bhulate bazinsa iinte ki ardade.

³⁴ gishaynal hamon yerindhan yin hapoon wodanka gobate ya'ayse gabanabee Guridanarbe ki giyade. ³⁵ zarisnol yerin haydhon shedana yinin doora utayse yesusdar ko na'ade. Meshin yin gidira utaa ea barin kisa mataysaka apala qadhayse Yesusisa roon deminte doorqayse ki daysaka kidhan yinin haapen wodanka ko pimbidine. ³⁶ mishinka yedadha ea kin pashon hapanal hate kin pashondhan Zarisna ko giyade. ³⁷ Gergesonsa igasante doono eeno wul kati konin pimbhona ogora ki yee Yesusdhan ko miskade; kidil Gongalandar ardayse maatate ki ya'ade. ³⁸ mishen yin gidira utaa ea Kimbete ya'ana Yesusdhan ki miskade: kidil yin giyayse ki yitade: ³⁹ «hasa oonindar matayse Bayroyn hana hayon garen yerndhan giyaa.» eal Yesus kina kin hayon garen yerndhan Gaban wul gidir may giyate ki ya'ade.

Na'an Diyonbee Eson Hajodhonbe

mat 9:18-26: mar 5:21-43

⁴⁰ Zarsino wul kin ne'endhan kalate kon doona Yesus kin maten wodanka wozanka ko tiyade. ⁴¹ ogo wodanka Yayaros hambhe misken ooninsa gare na'ayse yesusa roondar dhabayse kisa oonindar ki yee ki miskade. ⁴² kodhan kinina giyono, leensa thabhi lama yinsa doon nano hajadhayse diyana kon sanonane; kisal naasi kala bishine. kodi diyana saanayse ko daade. ogodar ya'ate ki daaka zarsino kupumate kati galshate kidhan ko daade. ⁴³ tabhi lama lee zombhyinsa lalmate doono maa kala ogote ko daade; yisa doon wuldhan dheshan genana machyise; pachana dama hayhatel qole. ⁴⁴ kodil Yesusisa budobar thezayse apalansa nukin ko lazade; lalmate doono zombhinol sanawa ko woyade.

⁴⁵ Yesusl «idhan laza hayne?» hamayse ki oysade. kidi wulate wodi latotone kinin hamen wodanka Phethirol «tamarse» zarsino hadhan kupmate» hasa panante konin ne'enka hayne idhan laza? harina hamee ki hamade. ⁴⁶ Yesus «eedi kala idhan lazidine: kanta igidira kon uton dhsayda dhese » ki hamade.

⁴⁷ esonol dhesadima ya'an kon damamon kon dheson wodanka; gibazate na'ayse Yesusisa birante dhambayse harna kon lazonbe hate sanawa konin pashondhan zarsin wulsa birante ko giyade. ⁴⁸ kidil; «isa naano hanin Amanono hadhan pachidine nagayanka yaa» ki hamade.

⁴⁹ Yesus akar giyate ki daaka eedi kala Ayiwd eenasa oshin oononsa gare Yayros oonira na'ayse « naano hasa diydine; keda kara Tamarsedhan galshabode» ki hamade. ⁵⁰ Yesusl ogodhan qansayse yayrosdhan « pimbabhode; Amana bish Amana; naano hasa pasha ko pashe» ki hamade.

⁵¹ Yayros ooninte kinin ardenka Bhethirosbee, Wannisbee, Yayqobbee, pirl

naansa imbabee indanbera abi hayatel kimbete ki arde nashaye.

⁵² ogo wodanka eeno wul kona eepate yuy yuy hamate ko daade; kidil «eepebhode naano ratdine diyaye» ki hamade. ⁵³ eenol konin diyondhan yinin dhesona hanchidine. ⁵⁴ kidi aanin kosa yedayse «yaa naano, dhabaa» ki hamade. ⁵⁵ naansal Sadan mataysaka sanawa dhabhayse Ko woyade; Yesusl isadhe kona ko Imbhe ki giyade. ⁵⁶ naansa imbabee indanbe hamon yerindhan yershidine; Yesusl ko hamon yerndhan hayna konal giyan ki gare ki giyade.

9

Yesus Tabhi lamana Tarjinadhan Kinin yitoono

Mat 10:5-15; Mar 6:7-13

¹ Yesusl tabhi lamana Tarjinadhan yidar eelayse Meshin wul ki bulee, burqora ki pache kantanbee hayamonbe ki Imade. ² pirl Bayrosa bitamon ki giyee hajadhanadhan ki pache, ki yitade. ³ Yin ki giyade:- «Yesa goyna boko konaal, surba konaal, gala konaal, birre konaal, apala abi konaal yedebhode. ⁴ raqin hamotel konal birayse yedhan shoshamon tiyaa ea ooninte ardidi yena raqin ogora yenin utenka yeka, ogote doorqe. ⁵ gaban eena yedhan tiyma shidhidi kena gabandhan garayse yenin yeenka yena tarja komate roonsa silndhan dinsayse utee.» ⁶ kidil kin giyaa goydeka utayse Bayrosa Qalin giyate raqi wul gidir burqadhanadhan pachate, gurdan wara gurdan wadar sagate ki ya'ade.

⁷ Galila peendhan wotise Herodis haydhon yern wuldhan qansayse, waani waani eenol wannis dembhira dhabidine; ⁸ waani Eelias ki hapadhade, waani pir enaa birayse Bayro kalanka qansayse eena giyaynasa kala dembira dhabhidine; hamayse dhalqate ko daade. ⁹ Herodisl «shye Wannissa inta inti qorcindha taska eetaka kidi diidine; keda kisa yen dhalqendhan Insa qanse kaa kidi hayne? »ki hamade; apinka hapana zagate ki daade.

Yesus Shii Dong Eenadhan Kinin Kunsoono

¹⁰ ergan genal maatayse yinin no'on wodanka yinin hayon wuldhan Yesusna ki giyade, kidil eensate Beete sayda hambhadhen gabandar ya'ayse yimal dhaa ki hamade. Yesus yisa tarjamonaa kinin yittaana eenaal kinn yittora maatayse hatte, yinin waadiymon wuldhan Yesusna ki giyade. ¹¹ Zarsinol kon dhesayse kisa panante ko ya'ade, kidil zarsindhan tiyayse Bayrosa Bitamon kina giyate ki daade; pashana zagaynadhanl pachidine.

¹² peenol sootana kon hamenka, tabhi lamana tamaral daran thazayse , « wonin doono dara pee konin doona zarsindhan gasante daana gurdanadar ya'ayse yinin wodhe raqibee galabe ko zage yitma»ki hamade. ¹³ kidil «kin isendhan kina yedi imee » ki hamade. kidil «ko wul zarsina yeke Balasha ya'ayse wo shanama wosa daana Balashana dongibe karaa lamara abi qolee» ki hamade. ¹⁴ shii dong kaysadha angina ogote ki daade. Yesusl Tamaradhan

«zarsindhan eedi lama kaysa apo tabhi, eedi lamaa kaysa apo tabhi hayays dotee» ki hamade.

¹⁵ Tamaral kin giyadisi eeno ko doorqe ki hayade. ¹⁶ kidil dong Balashanabee lamana kaaranabedhan yedayse dheg hamayse cacin shedayse imbadhan goshepayse qunthate Zarsina ki imee Tamarana ki imade.

¹⁷ wul Isayse ko mishade; tamaral kalanka shidhon dinmoon balashan sharqa tabhi lamaa ki dhasade.

Bhethiros Yesus Hay Kinin Doondhan Kin Tarjoono

Mat 16:13-19:Mar 8:27-29

¹⁸ rooro kala Yesus yimal miskate ki daade, Tamaral kimbete ki daade: kidil «Zarsino idhan hayne koda hamee?» hamayse ki oysade. ¹⁹ kidil «waani waani kisa shye Wannisne; waani Eeliasne waani pir ena birayse Bayro kalanka qansayse giyaynasa kala dimbira dhabhidine koda hame» ki hamade. ²⁰ kidil «Yedisin hayne yeda hame?» ki hamade. Bhethiros! «Bayroyn Bitinsa ya Kiristoosne» hamayse ki masade. ²¹ Yesus Kodhan haynatel giyan ki gare kati ki marade, ²² pirl « eedi Naasi gebhi gaale tiya ko zaske; pirl donzanabee, gudullasa hayonabee, Thapaynabekal jibadhayse; desadha ki dhesadhe; makanso rooronkal dembhira dhabha ki dhabhe» ki hamade.

²³ agasa budobar wulna yin ki giyade:- «Budonte Na'ana zage hay kenaal yidhan ki gare; mesqlindhan rooro wul baskayse isa panante ki nee: ²⁴ harna habhdihana Sadandhan dhachana zage kaysa ki kayse; sadandhan ina hamayse kayse dhaqa ki dhaqe. ²⁵ eedi peendar doon koymon wuldhan haapayse sadan yinondhan ki kaysena waginel ki joshkana kina hare ko poote? ²⁶ imbee isa qalinka ooshibhe; eedi naasi, yinon goshepinka pirl imbabee gazana Bayrosa ergan genasa goshpinka kin neenka ooshimbhayda ooshibhe. ²⁷ gon ida giye:- kote eena daanasa bakira Bayrosa bitamon haapima dimbhi dimina daane.»

²⁸ Yesus ogodhan yinin giyonsa budobar rooro lankayadha Bhethirosbee, Wannisbee, Yayqobedhan ensate miskana dhuka kaladar ki utade.

²⁹ miskendar ki daaka kisa Aapin kero ko okimade, Apalol guganasa bhalqantdisi Chawl ko matade. ³⁰ Shedee! eedi lamaa, kidil Musebee Eeliasbe, kimbete kinka dhalqate ki daade; ³¹ goshpinkal haapadhayse Yersaalem gidir hamana doon Yesusisa dembinbee dembhira dhabhayse peera edimayse kinin ye'endhan dhalqate ki daade.

³² Bhethirosbee kimbete kinka daana raat kisa na'aysaka raatayse ki daade; kin qaymenka Yesusisa goshpinbee kimbete kinka woyana lamana eenabedhan ki haapade. ³³ eenal yesus kalanka edimayse kin yeenka Bhetirose «Bita gebha kote wo daana wona payyane ogona makan baraa wo ashike kaladhan hanaqante kaladhan musena kaladhan eliyasna wo kee» ki hamade .yinin giyendhanl kidi dhesade.

³⁴ ogodhan giyate ki daaka cicono na'ayse ko kicade, Cicondar kin ardenka pimbidine. ³⁵ Ciconsa iinte «inin kama isa Naasa kaane; kidhan qanse» hame upsi ko qansimade.

³⁶ uspin yinin qansen wodanka Yesus yimal dayse ki haapadhade; Tamaral yerindhan woynamka ki yedade, yinin haapon yerindhan wodan ogoka haynatel giyaye.

Meshinka daa Naasadhan Yesusnin Pachoono

Mat 17:14-18; Mar 9:14-27

³⁷ sakahama dukara kinin hanshonsa budonte gebhi zarsino na'ayse Yesusdhan ko haapade. ³⁸ ogo wodanka zarisnsa bakira eedi kala uspin dheg hayayse yin ki giyade« tamarse isa daa naasa kidi bish kinin doona naasadhan ha shede ida miske. ³⁹ angaronin yedenka ki qabima koda ilatise, dubon aponka nitisate koda qatinse, zarandhan yin buchonsa budobar kati galishayse ko gare. ⁴⁰ hasa Tamara ki bule imiskade ko daanal damaye.»

⁴¹ Yesusl «Amaninsa qolmina wobon Adhadhana hamadha yeka yembete kinka ida dee? hamadha yeka idonshoo? naasadhan hasa ora ba'aa» ki hamade. ⁴² Naasa na'ate ki daaka Angaro peendar dhabayse ko qatinsade; Yesus Meshindhan bitayse Naasadhan ki pachade; imbanal masayse ki imade. ⁴³ eeno wul Bayrosa gembhakon ko yershade. kin hayon wuldhan eeno wul yershate ko daaka Yesus Tamaradhan; ⁴⁴ «ko inin giyen yerndhan kati hayayse qanse; eedi Naas saskayse eensa aaninte imbha ki imbhe» ki hamade. ⁴⁵ tamaranal gidhono dhalqino har kon doondhan kina ardaye; yero kina aashi konin doona dhesana damayse; ogona masayse oysana pimbidine.

Wulgidira Sagee hay ki doo?

Mat 18:1-5; Mar 9:33- 40

⁴⁶ ki kalanka hay kinin sagendhan Tamarasa bakira palime ko dhabade.

⁴⁷ Yesusl kisa woynaminsa qabondhan dhesayse naas kaladhan ba'ayse yikal ki woysade. ⁴⁸ yin ki giyade:- «kaa Naasadhan isa nabinka tiyee hay kenal idhan tiyaa ki tiyee, idhan tiyee pir idhan nitadhan tiyaa ki tiyee; wul gidira likaa matee kidi wul gidira sagine.»

⁴⁹ Wannisl «Bita gebha, eedi kalaa hasa nabinka meshi ki bulaka wo hapade; wombete kin daamona kidhan marana wo hayade»ki hamade. ⁵⁰ Yesusl «maran garee; yedhan jibimina wul kidi yenbete kinkane» ki hamade.

Samaria Eenayn Yesusdhan Kin Tyamo

⁵¹ Yesus cacindar kinin dhabhen wodan sanona Yerusalemdar ya'ana ki dhabhade. ⁵² birsayse ergan genadhan ogodar ki yitade; kidil yerin wuldhan ashkana Samaria gidir doon gurdan kalondar ki ya'ade. ⁵³ Yesus Yerusalemdar

kinin ye'endhan zarisno yinin dhesona gurdan ogote daana eena kidhan tiyana nashaye.

⁵⁴ TamaraYayqobibee Wannisbe ogodhan yinin shedenka «Bita gebha, Eeliasin hayadisi Nuu Cacira hanshayse eena kiradhan ko kayse wo erge; yaa ee hamawu?» ki hamade. ⁵⁵ Yesus daran wal hamayse wacimayse «yedi har menpas kalanka yenin doondhan dhesatene; eedi naas kina no'ono eedisa sada dhachanane; kaysanate» ki hamade. ⁵⁶ aga gurdara gurda abidar ki ya'ade.

Yesussa Panante Yadhenka Yeskayno Gaaleno

Mat 8:18-22

⁵⁷ goyn kin ye'enka eedi kala theezayse « han ye'en wuldar hambete ya'ayda ye'e» ki hamade. ⁵⁸ Yesusl «Gamirasal oolo; atinasal ooni daane; eedi Naas meten kingidir arse raq qolee» ki hamade.

⁵⁹ waa eedhanl «isa panante naa» ki hamade. eal « Bita gebha! birayse ya'ayse imbadhan l dukee» ki hamade. ⁶⁰ Yesusl « Diya'ana diya'anadhan ki dukee; garee, yaa ya'ayse Bayrosa bitamon giyaa»ki hamade.

⁶¹ eedi abi pir «Bita gebha! hambete ya'ayda yee, ko daanal birayse oonin eenana matate ya'ayse i elqime ina ee hamaa»ki hamade. ⁶² Yesus «wongasa woson yedayse budoka shedime eedi Bayrosa bitamona matee» ki hamade.

10

Yesus Eedi Makan Kaysa Apo Tabhi Lama Tamaradhan Kinin Yitoono

¹ Agasa budobar Bita gebha Waani eedi makan kaysa apo taphi lamaa^j eenadhan ki kamade. kidil ya'ana kinin qabana gabanabe ranqa wul birayse ki yiee lama lama hayayse ki yitade. ² yin ki giyade:- «Buradhayno isino gebhine; buurayna eena likane; ogona isinisa Bita gebha waadimayna eenadhan buurdhen raqindar ki yite miskee. ³ keda! ye'ee; yaatidisi ya'ayonsa bakinte yedhan ida yitee. ⁴ yesa goyna yer kalatel yedebhode; qalshi konaal surba konaal dungur konaal yedebhodhe; eedina nagaymako imate goyte woyayse kapebhode.

⁵ «oona wulgidir yenin ardenka birayse <nagaya oonin kona ko dee» hamee. ⁶ nagayan nashe eedi ogote daydihana yesa nagayano yeno oonin ogote daa ko dee; yetay koma yeno nagayano yedar maata ko maate. ⁷ kinin imen wuladhan isatebee wucatebe ogo oonite doorqe; waadimena damooz kasha ko kashadhe. oonin waara oonin waadar sagebhode.

⁸ «gabana wulgidir yenin ardenka eeno yedhan tiydi kona imbadhindhan isee. ⁹ ogote hajadhanadhan pachate Bayrosa bitamono yedar sandine hamee. ¹⁰ ko daana gabaa kaladar ardayse yedhan tiyay kema bhokandar utayse yin giyee, ¹¹ wosa roondar yedoon gabansa silin dinsoda dinse ko

daanal Bayrosa bitamono yekal konin sanondhan dhese kina hamee. ¹² yena yin ida giye:- ogo wodanka gaban ogora sodoomidar yeskayno pirdino lika ko matee.

¹³ «Kurazi gabante daana eena yedi hay, Beetesaydar daana eena yedi hay, yekal haydhono tarshayno thiroosbee sidoonaber haydhidi ko daana ena wodaa goomakondhan garayse dibinin yedar lalayse seeson waadimandhan garayse maatdi ki dee. ¹⁴ ko daanl pirdin wodanka yekalanka bashi thiroosbee sidoonabedar yeskayno lika ko matee.

¹⁵ Qipirnaahom ! yaa Cacindar dheg dheg hamade; mee thipandar hanshada hanshe.

¹⁶ yedhan qanse idhan qansa ki qanse yedhan tiyma idhan tiyee idhan tiyma nitadhan tiyee.

¹⁷ eedi makan kaysa apo tabhi lamanal wozadhate maatayse «Bita gebha» meshina hasa nabinka ee hamidine ki hamade. ¹⁸ kidil yin ki giyade meshi Gunganadisi cacira ki dhamaka I haapade. ¹⁹ keda gunibee qolpobedhan yetige; yesa galadhan yebashe; hayamon yena i imade. ²⁰ ko daanal meshina yena ee kin hamona wozedhe bhode; naabin yesa cacinte kon thaapadhona wozadhe».

²¹ ogo wodanka Yesus gazan uspinka wozadhayse, yin ki giyade:- «Cecinbee peenbesa Bita gebha imba ko wuldhan pakalabee garabe kalanka ashayse naanana hanin dhoyona goshpi hana ko dee. gone Bita gebha koro hasa payya qaabi matidine.

²² imba kalanka wul ina imbhahhidine: pirl naasa hay ki doondhan imba kalanka abi dhese qolee; pirl imba hay ki doondhan naasabee naasa dhoyan kinin nashana eenar abi hayatel dhese qolee.

²³ Tamaradarl wal hamayse waana kina yin ki giyade «yedi haapadhendhan haapayna aapina goshpadhanane. ²⁴ Idaa giyee gebhe Bayro kalanka qansayse giyaynabee binabe yen haapendhan haapana zagayse haapaye; yen qansendhanl qansana zagayse qansaye.

Eendhan Nashe Samaria Peen Easa Kansino

²⁵ rooro kala eedi gari kala giloondhan dhetse Yesusdhan taysate shedana na'ayse «tamarse lay daadhen sadandhan haapana har i hayoo? » ki hamade.

²⁶ Yesusl «giloonte thaapadhono har? hata Anbaba?» hamayse ki masade.

²⁷ eal masayse «Bita gebha Bayrodhan goinin woynaminka; goinin sadanka; goninin kantanka goninin qabonka nashaa; ha anantadhan hadisi hayayse nashaa; koda hame» ki hamade. ²⁸ Yesusl, «Gon ha masade; yal agadisi hayaa; sadanka daada dee» ki hamade.

²⁹ eal yidhan gaza hayayse taa isa aananta hayne?» ki hamade.

³⁰ Yesusl yin giyayse ki masade «eedi kala Yerusalemira Iyarkodar kin yeenka, shopitana aanite ki dhambade; apalandhanl burayse kidhan qanayse

diymbee sadanbesa sharinte hayayse garayse ki ya'ade. ³¹ gudil kala dhesima goyn ogoka yin neenka haapayse pegeka shedate ki sagade. ³² pirl lewi muldhanara eedi kala raqate na'ayse shedayse goyra dha hamayse ki ya'ade. ³³ Samaria eedi kala goyn ogoka kin ye'enka eenin daa raqadar ki yeskade yinin haapen wodanka kina burqadidine. ³⁴ theezayse hajimindar woyran zaytinkabee woynin hatasa cuubadhonka qadhayse ki dhaxade yinte ukuledar wodayse shooshinayn wodhen oonindar tiyayse ogote ki woywoyade. ³⁵ burinka dhabhayse lama dinar bulayse ooninsa imbana imayse eadhan ina woywoya kara bashi hanin bulendhan inta inin matenka hana kashyda kashe ki hamade.^k

³⁶ Keda makama shupitana aaninte dhamba easa aanamo maate; hama ki dheer?» ki hamade. ³⁷ giloon dhesel kina burqadhane ki hamade . Yesusl «ya'al ya'ayse agadisi haya» ki hamade.

Yesus Martabee Mariyambe Ooninte

³⁸ Yesusbee tamarabe goyti ya'ate gurda kaladar ki ardade; marta hambhadhayno maa kaloo yisa oonindar ko tiyade. ³⁹ kodil Mariyam hambhadhayno kosa imba naano ko daade: mariyaml Yesusa roon demnite dorqayse Qalindhan qansate ko daade. ⁴⁰ Marta waadima daran mirgaysaka koosadhyse yin doona daran thezayse «Bita gebha, naano waadimandhan l bishidar garayse konin doorqenka lay hamoo? idhan ko kelshe giyaa» ko hamade. ⁴¹ Yesusl yin giyayse ki masade «marta marta yer gebhina hada qaabime, ⁴² yer zasikayno kala bishine: maryam kodi payya maaten yern kamidine: ogodhan kalanka tiydhe »ki hamade.

11

Yesusnin ^lTamarsono Misikeno

Mat 6:9-13; 7:7-11

¹ rooro kala Yesus raqi kalate miskate ki daade.miskendhanl kinsa macha tamarasa kala , «bita gebha, Wannis tamaradhan misken kin tamarsadisi yaal miskendhan tamarsa»ki hamade. ² Kidil yin ki giyade «yen miskenka yin giye:- cacinte daa imba wonte namo hasa ko gazade bitamono hano ko nee.

³ wona zasken galandhan rooro rooroka imaa.

⁴ wodil wodhan,

seesayna eena wulna wonin garadisi yaal wonon seesondhan wona garaa.

seesondar wodhan arsabhode; seesora wodhan dhachaa».

⁵ pirl yin ki giyade:- eedi kala kisa nashee, dayse sootin kedha lama daran ya'ayse «isa nashee Balasha makan idhan talqaa. ⁶ eedi kala isa edaa goytibar na'ayse kina in imee yer kaltel qolee.»hamayse ki meskade. ⁷ ooninsa

iinte daal idhan galshabhode; keroo dithadhidine naanal imbete wodhidine keda dhabhayse imana damatine hama ki hamo? ⁸ ida giye:- nashee kin doona dhabhate imay yemal kinin miskimona dhabhayse kinin zagon wuldhan ima ki imee.

⁹ ogona yin ida giye:- miskee, imibha ko imibhe; zagee haapeda haape; kerndhan kokee buldha ko buldhe. ¹⁰ harna hambhidihana, miskee wul tiya ki tiye; zagel haapa ki haape; kerin kokenal buldha ko buldhe.

¹¹ «yesa bakinte imba matayse ki daaka naasa kaara miskidi kena guun imee daaki doo? ¹² waaginl Bhula kin miskenka, qolpo ima ki imoo? ¹³ Yedi siyana matayse yedaaka yesa naanana payyan iminton iman yedhesdi yena cacinte daa imba miskaynana uspin gazandhan hate ki sagi imimne!» ki hamade.

Yesusbee meshinasa Gaar Be'el Zebulbe

Mat 12:22-30 mar 3:20-27

¹⁴ rooro kala Yesus meshinin apoon kaysa ea waraa meshi bulate ki daade. meshel yin utonsa budobar ea apoon kaya kin dhalqenka zarsinol ko yershade. ¹⁵ ko daanal kisa iira waani waani «Be'elzebul meshinsa gaareka meshindhan kida bule» ko hamade. ¹⁶ waani waani pir pachachayse shedana cacira milikit ki dhoye kidhan zagate ko daade.

¹⁷ Yesus kisa qabondhan dhesayse yin ki giyade:- «Bit kalaasa eena kinka kikalanka edimidi ki hana, bitamono kisa kaya ko kaye; oonin kallon eena kinka ki kalanka edimidi ki hana, oono ogoro kotima ko kotime. ¹⁸ inta meshinasa hayoa Be'elzebul kantanka inin mshinadhan buledisi yeda giye. meshi taal kinka ki kalanka edimidi ki hana, bitamono kisa hate ko woye?

¹⁹ keda inta meshindhan inin bulayno be'elzebul kona Yesa naana hayka ki bulee? ogona kidi yedar paradayna ki matee. ²⁰ inta mshidhan in bulayno Bayrosa kantanka kona, Bayrosa bitamono yedar kon noondhan dhesee.

²¹ «kantanka daa ea payya hayayse dhakimbhayse oonindhan kalidi kena angamo nagayanka ko dhe. ²² ko daanal kigira sagee kantan ea na'ayse kidhan bashidi kena, kindar shelonqunthon banqin angamadhan ki kalanka tiyaa ki tiyee; angamon wuldhan buurayse waani eenana roska ki roske.

²³ «imbete daama wul idhan jiba ki jibe; imbete puchama yitha ki yithe.

²⁴ «meshina eedi gidira yin uten wodanka yin gidir ukunse raqi zagayse noqoyn qolmon raqinte peen gurin wul gidir ki ya'aye; yinin ukunse raqi haapay yema; inin uton oonindar i maate kida hame. ²⁵ kinin maatenkal, oono sa'ate ashikadhaysaka ki haape. ²⁶ agasa budobar ya'ayse waani kalanka sagana waani tobha meshinadhan ensate ki nee; ardayse ogote ki dee; ea agana birayse yin doon ooninte ardayse ogote ki dee; aga easa machino ena hamora kati siyane.

²⁷ Yesus ogodhan giyate ki daaka; zarsinsa gidira maa kala uspin dheg hayayse; hadhan adhayse aamin qoshono handa goshpadhonone» ko

hamade. ²⁸ Yesusl «goshpadhana Bayrosa qalindhan qansayse ee hamaynane» ki hamade.

Yoonasis Milkitino

Mat 12:38-42 mar 8:11-12

²⁹ gebhi eedi Yesuskal na'ayse konin pucon wodanka kidi yin ki giyade:- «wodan koka doono eeno siyane; tarshen milkitin shedana koda zage; ko daal Bayro kalanka qansayse giye yoonas milkitira abi milkiti imbhadhe. ³⁰ Bayro kalanka qansayse giye yoonas nenewe gaban eenana milkiti kin daadisi eedi naas Taa wodan koka daana eenana milkit ki dee.

³¹ hayn woensa doono bino pirdin rooronka taa wodan koka daana eenabete dhabayse daran parada ko parade; harna hambinhana kodi solomonsa pakalmakon qansana peensa malera na'aydine; ko daanal shedee! solomon gidira sagi kote daane.^m

³² Nenewe gaban eenal piridin rooronka taa wodan koka daanabete dhabhayse kodar parada ki parade; Nenewe eena yoonas Bayrosa uspin kin giyen yin qansen wodanka seeson waadimandhan garayse Bayrodar ki matade; shedee! yoonas gidira sagi kote daane.»

Yesus Shakandhan Kin Dhetsoono

mat 5:15 6:22-23

³³ pir Yesus yin ki giyade:-nuunidhan yetayse ashi raqir wode waginl daran yer guupayse wode hayatel qolee; eeno ooninsa iinte kon ardenka kina ko hapadhe shakandha dheg hama raqidar ki wode. ³⁴ bishinsa shaka aapine. aapino payya ko daana, bishino wul shaaka ko dee. aapino hajadha ko haana, bishino wul thipante ko dee. ³⁵ ogona hadar doono shaakano thipa kon matomadisi haadhan gishaa. ³⁶ keda bishino wul thipa qolay koma shakanka thotha kona hasa bishin wuldar shaakano paki hamayse yin shaakodisi ko haapade.

Parasawian Eenabe Musesa Gilon Dhettsaynadhan yesesin wcimono

³⁷ Yesus ogodhan kin giyen wodanka parasawi eedi kala gala ki kuume kidhan ki eelade; kidil kinbete ardayse kumana ki doorqade. ³⁸ parasawiyal Yesus galan kumima birayse aanindhan kin shidhamondhan yin haapen wodanka yershidine. ³⁹ Bita gebha Yesusl yin ki giyade:- «yedi Parasawian eena galan yenin kuumen sharqanbe karambhanbesa zulondhan yeda shiyee; yesa iinte angarmobee wobamobe thothidine. ⁴⁰ yedi deganaa; zulondhan pija Bayro iindhan pijadaa? ⁴¹ Ko daanal yesa iinite doon yerdhan qambhinana imee; keeda wul yena payya ko maate.

⁴² yedi Parasawian eena hay! basobilabee maalebe pirl haqan wulsa aapin Bayrona iminto yeda bulee; tipan pirdinbe Bayro nashintanbe yeda gare; ko

daanal wanidhan yenin hayenka kiradhan garana damatene.ⁿ

⁴³ yedi Parasawian eena hay! Ayiwd eenasa oshin raqinsa goshipin borkotondar doorqana yeda nashe; pir gabansa gidinte eeno wul aanin yena ko dhase yeda nashe. ⁴⁴ eeni dhesma daran konin ye'en milkit matamon duuken yenin taxena hay!»

⁴⁵ gilon dhesaynasa kala masayse Yesusdhan :- «tamarse yin han giyenka wodhan hasa iirnitane »hamayse ki masade. ⁴⁶ Yesusl yin ki giyade:- «yedi gilon dhesaynal pir hay! eeno baskana kon damimon dethandhan yeda baskise; yedi yenti baskindhan aanisa kapinka hatel lazatene. ⁴⁷ yembanayn desana Bayro kalanka qansayse eena giyaynasa duukin yen gospena hay! ⁴⁸ keda yedi yembanasa waadiman yeda tarje; kisa waadimandhan yeda kedhe; kidi kidhan ki deesade; yedi kisa duukin yeda ashke. ⁴⁹ ogona Bayrosa pakalmakono yin ko giyade:- «Bayro kalanka qansayse giyaynabee ergan genabedhan yitayda yite; waani waanidhan desaki dese, waandhanl oyta ki oyte» ⁵⁰ ogona peen pijadhora yeka lalimono Bayro kalanka qansayse giyaynasa zonbhino wul; ⁵¹ Abeelsa zombhira yeka marshan yinkdir mashaden raqintebe gazan ooninsa sharnte diyaa oo zakaryas zonbhindar yeka; ko adhadhora ki zage yine idaa hame;ko adhadhora kida zage.

⁵² «Yedi gilonsa gara hayi! dhesintonsa qolipendhan tiydine yedil ardhete ardaynadhan yeda mare.»

⁵³ Yesus agara yin utonsa budobar thapaynabe parasawian eena kati jibatebe oysonkal kidhan barsan ki yedaade. ⁵⁴ kisa apora uten qalinka kidhan yedana zagaysne.

12

Yesus Yedhan dheg Haynana Kinin Giyoono

Mat 10:26 -27; 16:6

¹ ogo wodanka gebhi shi zarsino kinka kidhan tigatebe kupimate bukayse ko daaka. Yesus tamarana yin giyan ki yedade «birayse Parasawian eenasa matira yedhan gishe; ogorol yesa maltamone. ² ko daanal my matama kicadha dhesadhma ashadha kala hatel qolee. ³ ogona thipante yin dhalqayno wul shkante ko qansime; ooninsa gulinte hashikimayse qaminte kina yen giyayno qalente koda gidhe.

⁴ « isa nashinato yin ida giye:- wandhan desaynadhan agara usi kala hatel hayana damemondhan phimbhebhode. ⁵ ko daanal yen phimbhe hay kinin dondhan yena dhoyayida dhoye yinin deesonsa budonte; mee thipante dhibana hayamonsa dadhan kidhan phimbhe; yinee kidhan phimbhe ida hame.

⁶ suutana dongadhan santem lamadar shanshadhatayu? komal ki kalanka kala kenaal Bayro kalanka walldhaye. ⁷ yesa sitino yeno wul paydadhedine keda phimbhebhode; gebhi atina sutana kalanka yedi sageda sage.

⁸ « yin ida giye:- Eedi birante tarje wulina eedi Naasi pir Bayrosa ergan gensa birante tarja ki tarje. ⁹ eedisa birante inta Yesusdhan dhesatene hamee intal Bayrosa ergan gensa birante kidi inti eeditee ida hamee.

¹⁰ eedi naasdar siya giye wul kisa seesondhan gardha ko gardhe; Manpase carangindhan iyyrena seesono kina gardhe.

¹¹ «eeno yidhan yedayse Ayiwd eenasa ooshin raqindarbee, hayonadarbee, gebanabedar ensate kin neen wodanka hate waadinl har wo masoo hamayse qabemebhode; ¹² ogo wodanka Manpase Carangino yinin dhalqndhan giya ko giyee.»

Ea Wodimosa Degamakono

¹³ Zarsinsa bakira eedi kala «tamarse, imba naasa imbasa koymora ina ki kashe giyaa» ki hamade. ¹⁴ Yesusl «yaa ea yesa bakente pirdin i paradebe koymon i kashe hayayse eedhan woda hayne?» ki hamade. ¹⁵ pirl:- «eedisa sada koymosa thothamodar konin wodadhamona yedhan gishe; agarmormon wul gidra yedhan kale»ki hamade.

¹⁶ pirl yin hamayse kansinka ki giyade:- «haamin yinsa kati usha wodimo kala ki daade:- ¹⁷ aga eal Isinin kodhan ingidir puche raqi kon qolmona har i hayo? hamayse woynaminka ki qabade. ¹⁸ «yin ki giyade:- yin ida hay; daana kodhanadhan kotayse abi wori konadhan ida asheke; ogote isa isininbee waani koymon wul ida gapee:- ¹⁹ sadandhan «isa sadano, gebhi le'ena maate koymo gebhi puchidine:- keda ukunsa, isa, wuca, wozadha» ida hamee ki hamade. ²⁰ Bayrol «Ya kaa deega, sadandhan ko sootinka hakalanka tiidha ko tiidhee; keeda hana han puchono hayna ko dee? ki hamade. ²¹ yina peendar koymon puche Bayrosa birante qambhi maata ea kaa disine.»

Qabimebhode

mat 6:25-34

²² agara Yesus tamarana yin ki giyade:- «ogona yena ida giye:- yesa sadana «Haro isoo? yesa bishna Haro qadhoo?» hamayse qabebhode:- ²³ sada gala kalanka; bishi apala kalanka; basha ki bashe. ²⁴ Ayrnadhan shedee; kidi yithee, shike, kingidir puche duuge kisa qolee:- Bayro kidhan kunsa ki kunse. yidi atina kalanka kati bashatenu? ²⁵ yegira qabimayse le'en yinondar rooro kala arsana damee eedi hayne? ²⁶ keda yerin shitin hayana yedamama, yer abina harne qabime?

²⁷ «yinda Aamana hate kinin gebhendhan shedee; qajadhe, pudool qanee. ko daanal yena ida giye:- Salamooni yisa goshpin wulka kira aamanasa kaladisi qadhaye. ²⁸ keda Bayro kina hapadhayse saka nuunte dhabadhen tooren shudhindhan yin qatidi kena yedi Bayrodar amandhensa joogana yedhan hate saskayse ki qatimine?

²⁹ ogona hari yin isenbee hari yin wucenbedhan zagate woynaminka

qabimebode: ³⁰ harna hambhidihana Bayrodhan Amanama eenal kodan zaga ko zagee, yena koro wul konin zaskendhan cacinte daa Imba yente dhese ki dhese. ³¹ ko daanal birayse Bayrosa bitamondhan zagee; yena zasken wuldhan imbha ko imbhe.

³² «yedi likana eenato, bitamondhan yena imana imba yentesa payya qabi kon doona pimbhebhode: ³³ dondhan shanshayse qambhinana imee; diibin diibimonte kosoyin ukimonte geshimon surbante maqimon koymon cacinte puche: ³⁴ woylamo yesa koymonin doon raqite ko dhee.

Qaymayse Kalinta

Mat 24: 42-44

³⁵ « cona dhaximbhayse kalee; shakanol yesa ko yedee: ³⁶ ooninsa imba gaydora maatate na'ayse kerin kin kokenka, saana kina bulayna pakala eena maatee. ³⁷ oonin imbavn ne'en wodanka, wodhima qaymimi kaalate ki daaka kinin haapayna igira worshona eena goshipadhanane: gon ida giye:- kidil ashikimbhayse igira worshonadhan kumandar kida dotee; woyayse ki kunse. ³⁸ sootin kedha lama waginl deminka matadhenka na'ayse kidhan kinin shedenka, qaymimi daana igira worshona eena goshipadhanane. ³⁹ kodhan dhese; ooninsa imba diibi hama sa'ateka kinin ne'endhan dhesidi keena ooninin koydhenka lay hamayse shedee. ⁴⁰ yedil pir dhaximbhayse dee, eedi naas yenin dhesama sa'ateka ki nee.»

⁴¹ bhethirol «Bita gebha ! ko kansin wona moo, pir wulna ha giyoo?» ki hamade. ⁴² Bita gebhal yin ki giyade:- « keda galandhan wodanka ki ime, ooninsa imba eenadar kin wode ;gon hama pakalabee qara kunsee kidi hayne? ⁴³ ooninsa imba ki ne'enka waadimandar kin haapa aga worsho goshipadhane. ⁴⁴ gon ida giye:- doon wuldar kida wode.

⁴⁵ agaa worsho ooninsa imba saana nee kapa ki kape hamayse yisa woynaminka kin qaabenka, waadiman eena anginabee manabedhan qanaate, pir isatabee wucatebe bardhan ki yedana, ⁴⁶ agaa worsha ooninsa imba kin dhesama woda sa'ateka na'a ki ne'e; ñalipanka taxa ki taxe. agara kisa dayntandhan amaniminabte ki haye.

⁴⁷ «oonin imbasa qabin dhesayse ashkimbhama, kinin giyondhan hayama aga worshodhan kati qana ki qane. ⁴⁸ ko daanal dhesama qandhan kidhan zasken waadiman waadima ea kika ki qandhe. gebhi yina imbhadha ea kalanka gebhi koda zagadhe; gebhi elqime yina imbha ki kalanka gebhi ko kaldhe.»

Nagaya Dayma Eedima

mat 10:34-36

⁴⁹ « peendar nuu dhabana i na'ade; takil nuuno saana ko yedhe zarayda

zagee. ⁵⁰ ko daanal inin shidhimbhe shidhimbhe daane ogo shidhiben inin shidhimbhenka yeka kati idha qabime. ⁵¹ peendar nagaya imana inin na'aa yena maata ko maato? yena ida giye; yinte wana wana hayanane. ⁵² taki kaara yedayse ooni kala gidir eedi dongi daa ki dee:- makama lamanadar lamana makamadar dhabhayse edima ki edime. ⁵³ imbaa naasadar, naasal imbadar; indano naandar, naanol indandar; indano naasa geshondar, naasa geshonol akandar kidar dhabayse wana wana ki maate.»

⁵⁴ pirl zarsina yin ki giyade «poolono haynsa uutenbar kon utenka yen hapen wodanka:-sanawa <doobi na'a ko nee yeda hame:-yen daa ko dee:- ⁵⁵ ta pir haynin woenbar worano konin gibarsenka, kina peeno oydha ko oydhe yeda hamee; -agaa disi daa ko dhe. ⁵⁶ yedi malitina! peenbe cacinbesa milkitndhan dhesana dameda dame:- ko daanal wodan ko harine dhesan garaa?


⁵⁷ «yidi yenti gonin pirdin yena paradimino harnane? ⁵⁸ hambete wacima eabete paredhesa birante woyana hanin ye'enka; akar goyinte yaate ha daaka; qashimana goyite zaga; yin hayan hama hadhan ensate paradedar ya'a ki ye'e; paradel poolisanana sasikayse ki imee; poolisanal dhaxin ooninte ki dhabe. ⁵⁹ ida giye:- machen santime hanin kashinka yeka ogora uutatane.

13

Seesondhan Garayse Bayrodar Matimina wul Kaya ki Kaye

¹ Ogo wodankal eeno na'ayse bhilatoos kisa zombhindhan marshanbete kinka kin worsona galila eana kinka ki dheliqade. ² Yesusl masayse yin ki giyade:- «kira galila eena koro daran kon yesikona galila eena wul kalanka seeson gena kin daa maata ko maato? ³ yena ida giye; yintee;ko daanal seeson waadimandhan garayse Bayrodar ye mataama, wulatte yin kayeda kayee.

⁴ «waginl pir Seeloom ooninsa kuuban daran tirkaysaka diyana tabhe lankay eena yerusalem gidir daanaeena wul gidira seesonka kin daa maata ko maato? yintee idaa hamee ⁵ ko daanal Bayrodar maaten yema wulate agadisi kayeda kayee.»

⁶ pirl yin hamate kansika ki giyade:- «eedi kala woynin hamin raqinte kin kora shapi haaqa kala daade; kidil daran aapi hapana na'ayse kala hatel haapaye. ⁷ woynin haatasa waadiman gintal < shedee! ko shapin hatora aapi zagana lee makan na'ayse; kala hatel aapi haapatine. harna ko peendhan suun ko seese; taxaa?> ki hamade. ⁸ kidil yin giyayse ki masade:- <Bita gebha! kosa sukante duuba kayda kee; ⁹ usi leenka aapi kaydi kona payyane; wagin taxada taxee.»

Yesus Maa Kalandhan ukunse Rooronka Kinin Pashoono

¹⁰ Yesus qaysin rooroka aywdi eenasa oshin ooninte tamarsate ki daade.
¹¹ ogotel le'e tabhi lankaay meshinin hajimo genti hayono maa ko daade:- kodil wobo ko daade; tip hamayse woyana kati kona damime. ¹² Yesus! kodhan yin haapen wodanka eelayse, «ya esoono! hasa hajimora pashidine» ki hamade:-
¹³ yisa aanindhan kodar ki wodade; ogo wodanka tip ko hamade; Bayrodhan! ko goshpade.
¹⁴ ko daanal ayiwd eenasa ooshin ooninsa gare; Yesusdhan qaysin rooronka kin pachona; wacimayse; masayse zarsindhan «waadima yenka waadimbhadhayna rooro lax daane:- keda roorona igiraka na'ayse pashee; komal qaysin roorokate;» ki hamade. ¹⁵ Bita gebhal masayse :-«yedi maltina! yikalanka wanni wanni qaysin rooronk waaki waginl ukuli qaysin rooronka zelira bulayse noqon woshana qanate ya'ayma hayne? ¹⁶ koro esono Abraam naasi daayse lee tabhi lankay meshi dhxaysaka konin dora qaysen rooronka; kodhan dhxera bulana zaskayu?» ¹⁷ kodhan giyate ki daaka; jibaayna wul ki oshimbhade; ko daanal kinin hayon yerin tarishen wulka ;zarsin wulna woza ko matade.

Salithan Aapinsa Kansino

mati 13:31-32 mar 4:30-32

¹⁸ agara Yesus yin ki giyade:- Bayrosa bitamon oono har ko maate? harka kodhan i kansi hayoo? ¹⁹ eedi kala tiyayse haminsa iinte kinin yithaa Saliithasa⁹ aapi taxa haaqasa aapi ko taxee; kodil gebhayse haaqa ko maatade; cacin atina kosa dhangandar oonindhan ki ashkade.

²⁰ pirl yin ki giyade:- «Bayrosa bitamon oonindhan harka i kansi hayoo? ²¹ Maa kalo sharqa makan dhiil tiyayse; dhiiln wuldhan yinin taapanka yeka iinte konin woda maati ko taxee.

Kero Thuldhano

Mat 7:13-14; 21-23

²² agasa budobar Yesus Yerusalemdar ya'ate ki daaka kin sagayna gabanabee gurdanabe gidir tamarsate sagate ki daade. ²³ eedi kala thzayse «Bita gebha! pashayna eedi likaa bishu?» ki hamade; kidil yin giyayse ki masade :- ²⁴ «kereen thuldhanka adrana tangashe hamayse ida giyee; gembho eenol ardana zaga ko zage ko daanal damee. ²⁵ ooninsa imbaa dhabhayse kerindhan kinin dithonsa budonte mayanbar woyayse Bita gebha! bula hamate kerindhan kokan ki yedee; kidl hay yenin doondhan hamora yinin noondhan dhesatine hamayse yena ki maase. ²⁶ «yedi hambete kinka wodi kumidine; hambete kinka wodi wchdine; wosa bhokantel wodhan yaa tamarsidine yeda hame. ²⁷ kidil «hay yin doonbee hamora yinin noondhan dhesatine; yedi seeson gena wul i kalaka pegmibhe! ki hame.

²⁸ «Abraambee, Yisaaqbee, Yayqoobe, Bayro kalanka qansayse eena giyayna wul Bayrosa bitamonsa iinte yenin haapanka; ko daanal yedi usi mayandar dhabadhayse yenin shidhenka ogo wodanka eepibee asi qechabe ko maate. ²⁹ eeno faynsa utenbarbee haynsa woenbarbee Peensa warkatanbarbee mizaqanbarbe wul gidra na'ayse; Bayrosa bitamon kumandar ko doorqe. ³⁰ ogo wodanka budonte daana bira ki maate; birante daana budonte ki maate.»

YesusYerusalemina Kin Eepoono


Mat 23:37-39

³¹ ogo wodanka Parasawiansa waani waani na'ayse «Herodis hadhan deesana kinin zagena kora raqi abidar ya'aa» ki hamade. ³² kidl yin ki giyade:- «ya'ayse agaa gamirena giyaa; kinabee sakabe meshindhan ida bule; hajimon genadhan pachayda pache; rooro makanso rooroka waadimandhan machayda machee; kina hamee:- ³³ yin ko daanal Bayro kalanka qansayse eena giye Yerusalemira raqie abi gidir diinta zasikee; kinabee sakabee oshlabe ogodar ya'ayda yee.

³⁴ «Yerusaalem, Yerusaalem! ya Bayro kalanka qansayse eena giyayna eenadhan deesayno, hadar yitadhana eenadhan seenika paxayse deesayno! baasha yisa naadhan kapanansa deminte kon puchedisi; hasa naanadhan deminte puchana hamadha i zagaa; ko daanal yedi ee hametene:- ³⁵ oona yesa guuri maatayse ki shidhe . yin ida giyee:- Bita gebhasa naabinka ne'ee goshipadhane; yen hamenka yeka keda idhan hapatene.»

14

Yesus Parasawi Kala Ooninte Kin Ardoono

¹  Yesus ukunse rooronka parasawi eena garasa eedi kala oonindar gala kumana ki ardoon wodanka; parasawian eena kin hayendhan shedana kaalimate ko daade. ² ogotel bishin etaysaka gaale; eedi kala Yesusisa birante ki daade. ³ Yesusl dambindhan dhetsaynabee Parasawian eenabedhan «ukunse rooroka hajadhanadhan pacha payyamo waginl siyaw?» hamayse ki oysade. ⁴ kidl lay ki hamade. Yesusl eadhan yedayse pachayse ki yitade.

⁵ pirl«yekalanka eedi kalasa naasi»waginl waki ukunse rooroka boldante ki waxana sanawaa bulma hayne? ki hamade. ⁶ kidil agana kala hatel masoo hapana damaye.

⁷ Yesus eldhana goshpe raqi kinin zagen shedayse, kansonka kina yin ki giyade:- ⁸ «eedi kala gaydon raqindar hadhan eelidi kina; goshipin borkotondar doorqabode; goshpinka ha kalanka sagi ea eeldi ki hana ⁹ yelamanadhan eela na'ayse raqindhan «kaa eana gara» ki hame yal oshibhate mee yirki hama raqidar hada hanshe. ¹⁰ ko daanal han eeldhen wodanka yirki hama raqi

shedayse doorqa; eelal na'ayse isa nashe tura dheg hama borkotondar doorqa ki hame; ya'al ogo wodanka hambete kumana doorqana eena wulsa birante goshepadhada goshpadhe. ¹¹ harna hambhidihan yidhan dheg dheg hayee wul yirki ki hame; yidhan yirki yirki hayee wul dheg ki hame.»

¹² Yesusl kumana eela eana yin ki giyade:- « kumana hanin eelen wodanka aanin bazan ki masee; hasa nashedhan waginl hasa edadhan waginl hasa hamba naasadhan waginl wodinta ashintadhan eela bhode. ¹³ yin ko daanal kuman han ashikon wodanka Qambhinabee wobonabee aylanabee aapin kayanabedhan eelaa. ¹⁴ yin hayidi hana goshpadhada goshpadhe. igira talqan maasana kin damimona hataka caringina eena dembhira kin dhabhen wodanka Bayro hana Bazandhan kasha ki kashe.»

Kuman Gebhonsa Kansno

[Mat 22 : 1-10]

¹⁵ Yesusbete Kumana doorqanasa sharnte kala ogodhan Qansayse « Bayro bitamonte Thedayse galan kumee goshipadhane» ki hamade. ¹⁶ Yesusl yin ki giyade :- «eedi kala galaa gebhe ashikayse; gebhi eedi ki eelade. ¹⁷ kuman sa'aten yeskon wodanka eeldhana shooshinana :- yero wul ashikadhidine niee; hamayse ki eelee yesa waadiman eedhan ki yitade.

¹⁸ «ko daanal wul yinon kooyan giyan ki yedade; kala «taki akar Haami inin shanona ya'ayse shedinta ko zasko banzo! idhan gara» ki hamade. ¹⁹ « waak haaqa dongi waki ishanade igiradhan in qanena yeskatne banzo! idhan gara» ki hamade. ²⁰ waal pir «akar utaa imba inin doona na'ana damatne» ki hamade.

²¹ « waadiman eel maatate na'ayse ogodhan Imbana ki giyade. ogo wodanka Ooninsa Imba wochimayse waadiman Eedhan« sanawa Gabansa goyna gembhabe sagadhayna goynadar utaa: qambhinabee Wobonabedhan aapin kayanabee Aylanabedhan ora arsaa» ki hamade.

²² wadiman gentel:- ooninsa imbal! hanin giyono wul haydidne; akar takil raqi daane» ki hamade. ²³ ooninsa imbal waadiman gentadhan goynabe Zelasa goynadar utaa: oonol ko thothe han hapaa wul ba'ayse arsaa: ²⁴ Idaa giyee:- kumana eeldhana Igira eenasa bakira eedi kalatel isa kumandhan isee ki hamade.»

Yesussa Paanante Ya'ayna Kin Kashayno Gaaleno

[Mat 10:37-38]

²⁵ genboo zarseno kibete kinka ya'ate ko daaka; Yesus wal hamayse yin ki giyade:- ²⁶ «ora idar na'ayna wul; imbabee indanbee geshonbee Naanabee imba Naanabee mishanabedhan yisa sadan hatel shidhima garama; isa tamar maatana damee. ²⁷ yinon Mesqaln baskayse isa paanante na'ayma isa tamar matana damee.

²⁸ «yekalanka eedi kala ooni ashikana zagdi ki hana machana yin damenbee yin damimonbedhan birayse doorqayse koymon bulma hayne? ²⁹ kuuban woysayse machana bashadid kena shedayno eeno wul бага ko bage. ³⁰ yin ko hame < kaa ea kuuban woysan woysdine; machan bashidine.»

³¹ « shii tabhi banqin eenadhan ensa bita, shii eedi kala kaysa banqin eenadhan ensa bita kabete banqin kansana zagayse inta banqin kansana damaw? hamayse doorqayse qabima bita hayne? ³² banqin qansana yinbashimondhan dhesdi yena, kansana ne'e bitadar pege ki daaka donza daran yitayse qashimana ki zage.

³³ ta agadisi yesa hayate doon wul garma, isa tamar matana dame.

³⁴ «suqo daathane; suqo daathan garidi kena; maasate ki daathe harka ko haydhe? ³⁵ peena konal dubana konal poote; ogona usi mayanka ki dhabadhe.«qanse qame yinsa daa ki qanse.»

15

Kayaa Yaatasa Kansino

Mat 18:12-14

¹ rooro kala gibirin puchaynabe « seeson gena» wul qansana Yesusdar ko pucade. ² Parasawiyen eenabee, thaapinabel« kaa ea Seeson genadhan ki tiye; kimbete kinka ki kume» hamayse ki gundimade.

³ Yesusl kina kansika yin ki giyade:- ⁴ «yesa bakira eedi kalasa eedi dong kaysa yaat ki daana; kikalanka kala ki kayana eedi oydi kaysa aapo tabhi saladhan torente garayse, kaya yaatadhan yin haapenka yeka zagana ya'ayma hayne? ⁵ yin haapon wodanka, wozadhayse qocanka baskayse; ⁶ oonindar yin yesken wodanka yisa nashinabee yisa ashinabedhan yidar eelayse:- <Kaya isa yaatadhan inta haapidine; inbete kinka wozadhe> ki hamade. ⁷ agadisi <Seeson waadimandhan garayse Bayrodar maatadhen zagimina eedi oydi kaysa apo tabhi sal tipana eenara bashi seeson ea kala yisa seeson waadimandhan garayse Bayrodar kinin maatenka cacinte woza ko dee.

Kaya Santimesa Kansono

⁸ «waginl santim tabhi dirakima yinsa doono; maa kalo igira santimasa kala kaydi kena yin haapenka yeka nuun yetayse oonin sayse kati zagimno maa hayne? ⁹ yinin haapon wodanka; yisa nashinabee yisa ashinabedhan kidar eelayse <kaya koymadhan inta haapidine; inbete kinka wozade> koda hame. ¹⁰ inta yena yin ida giye:- agadisi seeso eedi kala seeson waadimandhan garayse Bayrodar kinin maatenka Bayrosa ergan genasa birante woza ko dee.

Kayayse Hapadha Naasasa Kansono

¹¹ pirl Yesus yin ki giyade:- «eedi kalasa naana lama ki daade. ¹² ki kalanka naasa lika imbadhan< imbo! koymon hanonsa ina yeskaynadhan imaa> ki hamade. imbal yisa koymondhan naanana ki kashade.

¹³ « rooro likasa budonte kana yisa koymon wuldhan puchayse pee pegedar ki yaade:- ogotl koymondhan alimayse ki kaysade. ¹⁴ koymon wuldhan kin maconsa budonte peen ogote kati daaqi ko daade: kidil galate ki daade.

¹⁵ ogona ogo peente daana eenasa eedi kaladar lashi ki hamade: eal wurguba ki gishe torendar ki yitade. ¹⁶ Wurgubanayn isen galan isana angardhate ki daade: ko daanal ogodhan hatel kina imee eedi qole.

¹⁷ «woylam yin wodon wodanka yin ki giyade:- imbasa ooninte daana waadiman eena galandhan isate mishayse masayna memayne? ko daanal inta kote daaqinka diyana i sanade. ¹⁸ dhabhayse imbadar ya'ada yee: « imbo! Bayrobee hamibedhan inta seesdine: ¹⁹ keda hasa naasi hambayse eeldhana damatene: waadiman genasa kaladisi idhan haya;>> idaa hame

²⁰ ogonal dhabhayse imbadar ki na'ade. «imbal akar pege ki daaka; hapayse kina ki burqadhade: imbal daran gobate ya'ayse yedar lashe hayayse ki sunqade. ²¹ «Naasal <imbo, Bayrobe hambedhan inta seesidine: keda hasa naasi matayse eeldhana zazikée> ki hamade. ²² ko daanal Imba waadiman genadhan yin ki giyade:-< saanawa wul gidira apala payyaa ba'ayse qatee, aaninal worqi arse ronaal dungur arse. ²³ waaki durpe ba'ayse mashe: wo ise, wo wozadhe: ²⁴ kaa naasa isa diydi daada ko danal taki sadanka daane kaydi daada hapadhidine.» agaral wozadhan ki yedade.

²⁵ «ogo wodanka gar naasa hamin raqinte ki daade: ogora matayse oonindar kin sanen wodanka gadi dhasadhaka ki qansade. ²⁶ kidil waadiman genasa kala eelayse; yero har kon dondhan ki oysade. ²⁷ waadiman gentel < hakana niidine nagayankabe payyamonka kin no'ona hamiba durpi waki kina ki mashade> ki hamade.

²⁸ gare imba naasal wachimayse oonindar ardan zagaye: imbal mayanka utayse ki arde ki miskade. ²⁹ ko daanal Kidi imbana masaysa yin ki giyade <kodha lee worshodisi hana i waadimade; han giyondhan kala hatel garatine: intal isa anamabete kinka i wozadhe kala quli anqasi ketakal imatane: ³⁰ ko daanal kaa naasa hasa koymondhan maana bulanabete kinka machayse kin neenka, durpi waki kina ha mashade.> ³¹ «imbal yin ki giyade, <isa naasa, ya rooro wul inbeate kinkane: ino wul hantine: ³² ko daanal kaa hakana diydi daada; sadaaka daane; kaydi daada hapadhidine: ogona wo wozadhebe wo kiribebe ko zask'e'»

16

Pakala Galan Kunsesa Kansino

¹ Yesus tamarana yin ki giyade:- «eedi wodimo kalasa galan kunse eedi kala

ki daade; aga galan kunse wodimo eesa koymonka kin aalimen aga wodimo eena wupa ko yeskade. ² ogona kidhan elsayse: < koro in qansayno harr? keeda yaa isa galan kunse matana han damimona: han gishen koymon paydayse ina imaa> ki hamade. ³ «galan kunshel woynamka yin ki giyade: <bita gebha! galan in kunsera idhan hanshana ki daade: hami koyana isa kanta qole, pir miskana oshibhayda oshimbhe; ogona harr i hayoo? ⁴ galan in kunsera idhan hanshdi kena; eena oonin yinonte idhan ki tiyee in hayendhan inta dhesayda dhese.»

⁵ «ogona oonin imbasa bazan yindar daana eena kala kaladhan eelayse, biradhan <ooninsa imbaa bazano hadar doono memayne?> ki hamade. ⁶ «kidil <eedi dong kaysa daa woyra zayti baza idhar daane> ki hamade. «galan kunsel <hanka talqon warqatandhan tiyaa saana doorqayse «eedi lamaa kaysa apo tabhi daa» hamayse thapaa» ki hamade. ⁷ «ogoral lansodhan: <hadar memayne daana?> ki hamade.« kidil: < eedi dongi kaysa surba gazigo> daane. galan kunsel, talqan warqatandhan tiyaa« eedi oydi kaysa surba » hamayse thapaa» ki hamade.

⁸ «ooninsa imbal siyan galan kunse eedhan kisa pakalmakondhan ki yershade: ko peen naana ki taxaynabete kinka kin doon daytano shakan naanara pakalane. ⁹ ogona yin ida giyee; peen ko koymono kon maqon wodanka lay dadhen ooninte yin tidhodisi: ko kayen peen ko koymonka yesa nashinadhan yena hayee.

¹⁰ «yer likaka gon maata yer garkal gon ki maate: yer likaka gon matama yer garka gon matee. ¹¹ keda; peen ko wodimakonka gon ye matama gon wodimakon hayne eelqimayse yena imee? ¹² eedi abi koymonka gon ye matama; yenon maaton koymon hayne yena imee?

¹³ «eedi kala bit lamana waadimana dame hayatel worsho qole: kaladhan jibayse waadhan ki nashe: waginl waana ee ki hame, waadhan baga ki bage. Bayronal koymonal worsho matana damatene.»

¹⁴ koymon nashayna parasawyan eena ko wuldhan qansayse yesusdhan ki bagade. ¹⁵ Yesusl yin ki giyade:-« yedi eensa birante yedhan Carangi hayaynane; kodaanal bayro yesa woynamndhan dhesa ki dhese: eedisa birante goshipadha Bayro birante bagadhane.

¹⁶ «dambinbee Bayro kalanka qansayse giyaynabe shye wanniska yeka waadimandar ki daade. ko daanal agara keda Bayrosa Bitamon wongelin ko giide; eeno wul ogodar ardana ko sarime. ¹⁷ ko daanal Bayrosa dambira yer lika kalatel kon shedhena cacinbee peenbe sagidi kona dhepine.

¹⁸ «yinon geshondhan oytayse; maa abi keme wul bulane; geshoyin oyton maan keme bulane.»

Ea Wodintabee Qanbhe Alazarbe

¹⁹ pirl Yesus yin ki giyade:- « koymo gebhika shandha aapaladhan qadha

rooro wul qabi qolma wozanka dee eedi wodimo kala daade. ²⁰ bishin wulsa hajim bish hama Alazar hambhe qambhe ogote eesa mayante wodhate ki daade: ²¹ wodintayn isen galara dhamon dinmon isana agardhate ki daade: qaskinal shidhima na'ayse kisa hajimin la'ate ki daade.

²² «qambhe agal didne: Bayrosa ergan genal Abraamisa demindar ki tiyade.wodintal ea pir diyaysaka dukadhine. ²³ seeson eena diya keena kin galen thipan raqinte dayse dhegi hamayse pegeka Abraamdhan ki hapade: Alazardhan! kisa deminte ki haapade. ²⁴ kidil:- «Abraam imbo! ina burqadha ko nuun rabhinate galate in doona Alazar Aaninsa nukika noqo lazayse isa Atabhin ki qache banzo nita» hamate ki ilatade. ²⁵ «ko daanal Abraam yin ki giyade:- «isa naasa, ya peente han doon wodanka payya yer han tiyadisi Alazar! pir yer siya kin tiyon bhocha: taki kidi kote ki wozadhenka yaa galendar hada dee. ²⁶ wulsa bhabar kora yedar sagan kin damimon:- Ogote daanal pir ora wodar sagan ki gare:- wonbe yenbesa sharnte gar boda wodadhine. ²⁷ «kidil yin ki giyade:- «imbo! keeda Alazardhan imbasa oonindar ha tiye ida miske:- ²⁸ harnahambhidihana dongi imba naana kin doona:- igiral ko galen raqindar na'an ki gare ya'ayse kina ki giyee.» ²⁹ « ko daanal Abraam :-«Musebee Bayrobe kalanka qansayse giyayna daane igiradhan ki qanse» ki hamade. ³⁰ kidil:- « Abraam, imbo! yinte:- eedi kala dimbhira dhabhayse ya'aydi keena seesora mata ki mate»ki hamade. ³¹ Abraam!:- «Musebee Bayro kalanka qansayse eena giyaynadhan qansay kema eedi kala dembhira dhabhidi kenal amane» ki hamade.»

17

Eedidhan Seesodar Yen Arisera yisa Mete Gishee

¹ Yesus tamaradhan yin ki giyade:- « eedina goon na'ano shidhe: ko daanal eadi naasidhan seesondar arise eana hay. ² kira likana naanasa kalana seeso maate eadhan deesime seeni kisa qorcindar dhaxayse bazindar dhabadhidi kena payyane. ³ ogona mete yesa gishee.

«hamba naasa haadhan seesedi ki hana kidhan wacima; yinon seesora maatdi kena kina garaa. ⁴ rooron kalonsa iinte tobha goyt hadhan sesays, pir hakal tobha goyt na'ayse, «hadhan inta «sesedine» hamate hadar maatdi kena kina garaa.»

⁵ ergan genal Bita gebhadhan «iminetndhan wona thosa» ki hamade. ⁶ bita gebhal kina yigina:- «Saliithasa^u aapidisi lika iminet yesa daydi kona kaa Shapadhan « bucumayse bazindar korima yehamidi yena ee hama ki hame» ki hamade.

⁷ pir Yesus yin ki giyade:- «yesa sharnte eedi kala hami koye wagin! qolle gishe worsho yinsa daa hamira kin maatenka saana galan kumana dorqa kina hame hayne? ⁸ yin ki giye inin isen galandhan ina ashkaa; inin isenkabee in

wucenkabe ya dhaxembayse woyayse kunsaa; agasa budobar yaa kumada kumee, wucada wucee hamayw? ⁹ aga worsho ea waadiman genta giidhondhan kin hayona kidhan goshipee? ¹⁰ agadisi yedil gidhon wuldhan yen waadimon wodanka; wodi potimina worshonane; hayaa han hamondhan wodi haydine.»

Bishin Hajimora Pashana Tambha Eena

¹¹ agasa budobar Yesus Yerusalem peendar kin ye'enka, Samariabee Galilabesa sharinka ki sagade. ¹² Gurda kaladar kinin ardenka , tabhi bishin hajimonka^v daana eena daran ki kerade. kidil pege woyayse ¹³ Usipin dhegi hayase elatate «Yesus bita gebha ! bannzo! wona burqadha ! » ki hamade. ¹⁴ Kidil kidhan shedayse «ya'ayse yisa bishindhan gudulana dhoyee» kina ki hamade. kidil goynte gudlladar ya'ate dayse pashayse ki carangade. ¹⁵ ki kalanka kala yin pashon yin haapen wodanka upsi garika Bayrodhan goshpate ki maatade:- ¹⁶ Yesusal roon demnite yisa wotinka dhambayse ki goshpade:- ea aagal samarawi eedi ki daade. ¹⁷ Yesusl yin giyayse ki oysade:- « caragana eena tabhitayu? ta sala eena hamote ki daa? ¹⁸ Byrodhan goshipana maatate na'aa een peen ea kaara eedi abi qolayu?» ki hamade. ¹⁹ eadhanl «Dhabhayse yaa; han amanono hadhan dhacdine» ki hamade.

Bayrosa Bitamonin Na'ayno

[Mat 24 : 23-28 ; 37-41]

²⁰ Parasawian eena«Yesusdhan Bayrosa bitamono haa ko nee?» hamayse kidhan ki oysade. kidil kena; yin giyayse ki maasade:« Bayrosa Bitamono eena haapadhen milkitnka nee: « ²¹ eenol: < kotene >waginl <saa ogotene > hamana damee: shede! Bayosa Bitamono yesa sharnte ko daade.»

²² ogoral Yesus tamarana yin ki giyade; «eedi naasisa rooronasa kaladhan shedana yinin angardhayno wodano naa ko nee; ko daanal haapatene . ²³ eeno: <saa ogotene> waaginl <kotine>koda hame: yin gidhakal kinin ye'endar utayse yebhode:- ²⁴ harna hambhidihana, guganin dhanqayayse peensa gasara peensa machindar kon shashkedisi eedi naasin ne'en rooronka agadisi yin ko maate. ²⁵ ko daanal ko hamima birayse eedi naas gebhi galebee wodan koka adhadhanakal bagadha koda zaske.

²⁶ «Nohe wodanka maatondisi eedi naasin ne'en wodanka yin ko maate. ²⁷ Nohe Gongalan garindar kinin arden wodanka yeka, eeno isatabee wucatebe, keematebee kinsatebe ko daade. kaysayno noqono na'ayse wuldhan ko kaysade.

²⁸ «Loothe wodanka yin ko daade; eeno isaatebee wucaatebe, shanaatebee shanshaatebe, haqa koraatebee ooni woysaatebe ko daade; ²⁹ Loothe Sodoomra kinin uta rooroka, cacira nuubee nuusa qooshinabe dobidisi qanayse een wuldhan ko kaysade. ³⁰, «eedi naasin kinin ne'en wodanka

agaadisi yin ko dee.

³¹ agaa rooroka ooninsa zulondar daa hayatel eedi ooninsa iinte doon koymondhan tiyana oonindar ardan ki gare; agadisi haamin raqante daa eedi budonka oonindar maatan ki gare. ³² Loothesa geshondhan bhochee.

³³ sadandhan dhachana zage wul kaysa ki kayse; sadan yinondan kayse wul dhacha ki dhache.

³⁴ yin idha giye:- Sootin ogoka lama eena alga kaladar ki wodhe: kala tidha ki tide kala shidha ki shidhe. ³⁵ maa lama kinka ki desme: kalo tidha ko tidhe waa shidha ko shidhe. ³⁶ eedi laama haamin raqinte kinka ki dee; kala tidha ki tidhe waa shidha ki shidhe.»

³⁷ kidil maasayse; bita gebha! kindar tidhayno hamotene?»ki hamade. kidil« yer diyayn doon raqin ogote kuthoda puce» ki hamade.

18

Tozadhima miskon Maan Qambhinsa kansino

¹ tamaral tozadhima rooro wul miske kidhan kon zaskendhan dhoyana Yesus ko kansinka ki giyade: ² yin ki giyade:«gaba kala gidir daa Bayrodhan peembhima eendhanl ooshmbhima eedi kala prdin parade ki daade. ³ gaban ogote doono maa qambhi kalo daade; kodil pirdin paradekal na'ayse <inbete wochima isa quuqan eadhan ina ki parada hamate kidar maatate ko daad.

⁴ «paradel konin giyon yerindhan kona gebhi wodana tiyana zagaye; agasa budobar yisa woynaminka:- < kalatel Bayrodhan i pimbhama: eedinanl i ooshmbhama: ⁵ koro qambhino idhan konin galshena, kona paradayda parade. yintay ko hama rooro wul na'ayse idan ko galshe.»

⁶ bita gebhal yin ki giyade; «siya pirdin parade kin giyon qanse. ⁷ Bayro rooronbee sootinbe daran miskayna kin kamanana paradayu? kin miskondhan kati tozadha ki tozadho? ⁸ yin ida giye: sanawa kina ki parade: ko daanal eedi naasi ne'en wodanka peendar iminetinka daa eedi inta haapaw?»

Parasawian Eabee Gibirin Kachayna Eenabesa Kansino

⁹ yedhan tipa yin daadisi hayse poorbhaynabe waani wuldhan kati bagynana; kaa kanso ki giyade: ¹⁰ eedi lamaa Bayrodhan miskota Bayrosa gazan oonindar ki ya'ade; kalaa Parasaw eedine; wigel gibirin kachene.

¹¹ Parasawiyel yimal woyayse yin giyayse ki miskade :<Bayro intaa eedi waani wuldisi samime, siya,bula, waginl ka gibirn kache eadisi in damona hadhan ida goshpe: ¹² Gaba kalasa iinte rooro lamaa ida qoome; inin haapayna tambha wulsa iira kaladhan hana ida ime» ki hamade.

¹³ «gibirin kache pege woyayse tura cecindar dheg hamayse shedana zagaye: ko daanal sadandhan ca'ate: <Bayro! inta seeso genti in doona ina gara hamate ki daade. ¹⁴ «yin ida giye:- Parasawi ea kalanka bashi ea kaa

Bayrokal tipa maatayse oonindar ki ya'ade; yidhan dheg dheg hayayna wul yrki ki hame: yidhan yrki yrki haye dheg ki hame.»

Yesus Naana shaqanabete

¹⁵ Yesus naanadhan ki laaze eeno daran ba'ate ko naade: tamaral ogodhan yin haapon wadanka ki wacimade. ¹⁶ Yesusl naanadhan yidar eelayse yin ki giyade: «naana idar ki nee gare marebhode: Bayrosa bitamono kira naanadisi maatana eenanane. ¹⁷ gon ida giye:- Bayrosa bitamondhan naasdisi maatayse tiymina wul hate konal daran ardee.»

Ayiwd Eenasa Wodinta Gare

¹⁸ Ayiwd eena Gembhasa kala; «payyan tamarse rooro wul lay daadhen sadan Haapana yer har i hayo?» hamayse ki oysade. ¹⁹ Yesusl yin giyase ki masade: «harna indhan payyan tamarse hame? kalaa Bayro bish kalanka payya abi hayatel qolee: ²⁰ Bayro kinin giyondhan dhesada dhese:- buula matabode, deesabhode, dibabhode, budamonka tarjabhode; hamibabee handabedhan goshepa» ki hamade.

²¹ eal «igira yeradhan naasamora yedayse inta kalidine»ki hamade. ²² Yesusl ogodhan qansayse: «ta yer kalaa hakalanka shidhidine; ñasa doon wuldhan shanshayse qambhinana imaa hasa bazandhan cacinte hada haape: agara isa panante na'aa» ki hamade.

²³ kidil dhelqin ogodhan qansayse kati eedi wodimo yinin doona gebhe guman ki diyade. ²⁴ Yesusl eadhan shedayse yin ki giyade: «eedi wodimo Bayrosa bitamon oonindar ardana kina hate dethane? ²⁵ wodimo Bayrosa bitamon oonindar kin ardena gamale marpisa pulaka utidi kona dhepene.»

²⁶ qansana eenal; «keda dhaqana damee hayne ? »ki hamade ²⁷ Yesusl «eedina damimino Bayrona damima ko damime» ki hamade.

²⁸ bhethiroosl «Sheda, wodi wosa doon wuldhan garayse hasa paanante wo na'ade» ki hamade. ²⁹ Yesusl yin ki giyade:- gon ida giyee; Bayrosa bitamona hamayse yisa ooninbee yisa gshonbee yisa imba naanabe yisa imbabe indanbedhan yisa naanadhan garee; ³⁰ ko wadanka sagi gebhi; ne'en wodanka lay deen sadan timaa hayatel qole.»

Yesus Dembin Yinonsa pir Kin Giyoono

³¹ Yesusl tabhi lamana tamaradhan waana bulayse yin ki giyade: «kedaa Yerusaalemdar utoda ute: Bayro kalanka qansayse eena giyayna eedi naasisa kin thaapono wul machino maqa ko maqe. ³² ayiwuditay hama eenana saskayse ima ki ime: kidil baga ki bage: idhan galsha ki galshe: idar pathima ki pathime: ³³ yin qanonsa budonte dhese ki dhese; rooro maknsoka dembhira dhabhayda dhabhe.» ³⁴ tamaral kin giyon wul gidiraa kalatel kina arda yer qole: kin giyono kina ashii ko maatade: yer harsaa kin giyondhan dhesay.

Ea Aapin Kayan Pashoono

mat 20:29-34 mar 10:46-52

³⁵ Yesus iyarko gabante kinin yeskon wodanka, aapi kaya eedi kala goynsa aponte dorqayse miskimate ki daade. ³⁶ aapin kayal zarsinin ogoka kon sagen qansayse, ogoro har kon doondhan ki oysade. ³⁷ eenol:«Naazret Yesus koka sagate ki daade » hamayse kina ko giyade.

³⁸ kidil «Dawt Naasa Yesus idhan dhaca! »hamayse ki ilatade. ³⁹ kisa birante ya'ayna eenal laye ki hame kidhan ki wacimade: kidi;«dawit naasa idhan dhaca !»hamate kati ki ilatade.

⁴⁰ Yesusl woyayse eadhan daran ensate ki na'adhe ki ergade: daran kin thezon wodanka: ⁴¹ «Hana har i haye ha zage?» hamayse ki oysade. aapin kaya eal:«Bita gebha shedana ida zage»ki hamade. ⁴² Yesusl: « shedaa hanin amanono hadhan pachdine »ki hamade. ⁴³ eal Saanawa shedan ki damade: Bayrodhan goshpate Yesusisa panante ki ya'ade. zarsino wul ogodhan haapayse Bayrodhan ko goshpade.

19

Giberin Puche Zakiyos

¹ Yesus iyarko gabante ardayse kosa shaarinka sagate ki daade. ² naabensa Zekiyos hambhe eedi kala ogote ki daade; kidli giberin puche wodimo ki daade. ³ kidil Yesus hambhe hamaa kinin doondhan shedana ki zagade; eedi orgo kin doona zarsinin thothona haapana damaye. ⁴ Yesus goyn ogoka sagate kin doona shedana usi brandar gobayse haqa shapdar ki utade.

⁵ Yesusl raqin ogote yinin yeskon wodanka dheg hamayse: «zekiyos kina oonin hanote idaa haqe sanaa hansha»ki hamade. ⁶ kidil sanaa hanshayse wozanka ki tiyade.

⁷ ogote daana eenal ogodhan haapayse; seeson genta oonte ardayse kumana ki daa»hamate wul gundiman ko yedaade. ⁸ Zekiyos woyayse Bita gebha Yesusna:«Bita gebha isa doon koymon wulsa iira antindhan qambhinana ida imee; eedi haysal buudamoka inin tiyaa koymo daydi ko hanal maasate kina oydi goyit sasikayse ida kashe» ki hamade. ⁹ Yesus yin ki giyade:- «eaa Ea Abraam naasi kin doona kina dhaqo oonin kodar na'aydine. ¹⁰ Harna hambhidihana eedi naasi kina no'ono kayadhan zaganabee dhachanane.» ki hamade.

Tambha Waadiman Eenasa kansino

mat 25:14-30

¹¹ zarsino ogodhan qansate ko daaka: kansinka pir yin ki giyade: harna hambhidihana;Yerusaalemdar kin sanonbe eenol Bayrosa bitamono kon

haapadhe kon matonane.

¹² ogona yin ki giyade; «eedi hayoo kala Bitamon hayamondhan tiyayse maatana pee pege ki ya'ade. ¹³ waadiman genasa bakira tabhan eelayse koymo imayse «maatate inin ne'enka yeka ko koymonka nagade» ki hamade.

¹⁴ ko daanal «kisa waadiman gena kodhan kin jibona, «kaa ea wodar ki bitime wodi zagatone» hamayse kisa paananate ergan gena ki yitade.

¹⁵ «yin ko daanal kaa hayoo biti maatayse peendar ki maatade: igira waadiman genal kin imon koymonka nagadayse hamadha kin adhison dhesana ki eelisade.

¹⁶ «Biraa waadiman genta kalan na'ayse «bita gebha ina han imon koymonka tabhi koymo adhima i haapade» ki hamade. ¹⁷ «bita gebhal : «ya ea tipa, payyaa hayade; yer likaka tipa maatayse han doona: tabha gabanadar hayoo maata » ki hamade.

¹⁸ «lansol na'ays: «bita gebha hanin ina imon koymonka nagadayse dong koymo i adhisade» ki hamade. ¹⁹ «bita gebhal: «ya pir dong gabanadar inta hana hayamo imidine» ki hamade.

²⁰ «waal waadiman ginta na'ayse yin ki giyade: «bita gebha; ina han imono koymon apala saraka ooshayse i wodade kosha: ²¹ Yaa eedina burqadhima eedine hanin wodamon tiye han ythamon shike ciubo eedi han doona i pimibhade.» ²² «bita gebhal yin ki giyade:- «ya siyaa waadiman genta! hanoon qalnka hadar ida parade: in wodamondhan in tiyen; in thamon in shiken; ciubo eedi in doondhan yaa ina gidine; ²³ na'ayse koymondhan adhimanka i tiye; harna nagadayna eenana iman haa garaa?»

²⁴ «bita gebhal Ogote woyanadhan yin ki giyade «koymondhan kalanka tiyayse tabhi koymon adhisana imee» ki hamade. ²⁵ «eenal; «bita gebha kidi birayse kina imbhono koymono kisa daane» ki hamade. ²⁶ «kidil yin ki giyade; «daana wulna imbha ko imbhe; ynsa qolmasa daana wul tidha ko tidhe. ²⁷ ko daanal i bitiman garee nashminadhan igiraa isa galadhan kote ba'ayse isa birante deese.»

²⁸ Yesus kon kin giyonsa budonte; Yersaalemdar birayse ya“ate ki daade.

Yesus Goshpe Gebhika Yersaalemdar Kinin Ardoono

[mat 21:1-11; mar 11:1-11 wan 12:12-19]

²⁹ Dabirezayt hambhen dhukandar doono; Betepagebee Bitaniabe gurdana yin thezen wadanka: tamara lamanadhan yin giyayse ki yitade:- ³⁰ « yesa birante doon gurdandar ye'ee: ogote yen ardenka, eedindar yendar doorqama ukuli ooto dhaxadhaysaka yeda haape; bulayse oraa kote be'ee. ³¹ hay hatel: «Harnee bule?» hamayse yidhan ki oysina, «Bita gebhana zasika ki zasike» hamee.»

³² Yitadhanal ya'ayse kinin giyondisi ko maataysaka ki haapade. ³³ imbanal uklisa oota kin bulenka haapayse:- «ootadhan harnee bule?» hamayse kidhan

ki oysade. ³⁴ kidli «Bita gebhana Imba zaga ki zagee » ki hamade.

³⁵ ogoral ukulin ootadhan Yesusdar ki ba'ade:- yisa apalandhan daran wodayse yesusdhan Ukle ootadar ki dotade. ³⁶ eenol ya'ate kin doon goyndar apalan apate ki daade. ³⁷ Dabirezayt dhukara gurma mee hanshen goynkal kinin sanon wodanka paydonsa kati gebhe hama tamara yin haapon yern tarshen wulka wozadhate ushindhan dheg hayayse yin hamate Bayrodhan goshpan ki yedaade: ³⁸

«Bayrosa naabinka ne'e bitaa goshpadhane!

«Cacinte nagaya ko dee:-

Bayronal goship ko dee» hamate ko daade.

³⁹ Zarsinsa sharinte doono wani wani Parasawiyana Yesusdhan:- «Dhetse, hasa tamaradhan wachimata» ki hamade. ⁴⁰ kidil:- « yin ida giye:- kidil lay kemakal:- seena ilata ki ilate» ki hamade.

⁴¹ Yesus Yersaalemdar yinin sanenka Gabandhan haapayse kona ki Eepate:- ⁴² yin ki giyade:- «Hana nagaya be'en yerindhan kina rooron ha dhesidihana hana payyane! ko daanal koro hakalanka adhibhidine. ⁴³ hasa gala hasa sukante kermin woysayse wara waral karayse hadhan kinin galshayno wodano na'aa ko ne'ee. ⁴⁴ hambee hasa iinte daana naanabedhan peendar dhabayse kaysa ki kayse:- seen seendar kotimima shedhe:- harna hamidihana Bayro hadhan dhachana kinin no'on wodandhan dhesatane.»

Yesus Misken Ooninte

[mat 21:12-17 :mar 11:15-19 wan 2:13-22]

⁴⁵ kasa budobar Yesus misken ooninsa iinte ardayse, ogote shanmaynadhan ogora oytan ki yedade:- ⁴⁶ pirl «ooino isa miske ooni ko dee» hamayse thaapadhidine; yedi diibina eenasa aadhimibhe raqi ye hayade!» ki hamade.

⁴⁷ rooro wulka Bayrosa Gazan ooninte tamarsate ki daade; ko daanal gudulasa garabee, thaapaynabee zarsinsa gembhabe deesana zagate ki daade:- ⁴⁸ ko daanal zarsino wul kisa temirtenka wozadhayse yisa woynamindhan daran konin hayonane.

20

Yesussa Hayamon Aywudi Eenana Oysime kon Matoono

[Mat 21:23-27 ; Mar 11 : 27-33]

¹ rooro kala Yesus Zarsindhan gazan Ooninte Tamarsate Wongelndhan kin giyenka gudulasa hayonabe thapaynabe donzanabe bukayse daran ki na'ade: ² eenal:-« kira yeradhan hanka hayayno har hayamoka kon doondhan giyaa: ko hayamon hana Imaa aga kidi hayne?»hamayse ko oysade. ³ kidil yin giyayse ki masade:-« Intal oyso kala i oyse: yinda masee: ⁴ Wannis noqonika

kin shiyayno Cacira kodamo Peerawu?»ki hamade

⁵ eenal yin giyayse kinka kikal ki dhalqade:-«Cacirane wo hamaa:«ta harrne Amanan gara? ki hame: ⁶ «eedi kalankane» wo hamana, Zarsino wul Wannis Bayro kalanka qansayse giyee ki doondhan kon Amanena wodhan Seenika paxate deesa ko deese.» ⁷ ogona «hamora kon doondhan wodi dhesattone» hamayse ki masade. ⁸ Yesusl «Ta intaal yera kiradhan har hayamoka inin hayendhan yena giyatine» ki hamade.

Woynin Haaminte wadimayna Eenasa Kansono

[Mat 21:33-46; Mar 12:1-12]

⁹ zarsina kansika giyan ki yedade:- « eedi kala woyn haata ki korade: haamin koynanal Elqimayse yena maatendhan kosa iira isaate, waani Aapindhan ina imee hamayse Pee abidar ya'ayse gebhi woda ki kapade. ¹⁰ Woynin haaqanasa Aapin shonbhen wodan yeskaysaka, Woyninsa Aapindhan ki niite waadiman gentadhan igira haamin koyaynadar ki ytade: haamin koyaynal waadiman gentadhan qanayse Aan guuri ki ytade. ¹¹ Tapir abi waadiman gentadhan ki yttade; haamin koyaynal kidhan pir qanayse ooshinsayse Aan guuri ki yttade. ¹² takil pir makanso waadiman gentadhan ki yttade, haamin koyaynal kidhanl pir qanayse hajinsayse mayandar ki dhabade.

¹³ «Woynin hatasa imbal: «keda Hate hayo? yinda pir inin nashe naasadhan ida yitte; kidhan goshpe handa » ki hamade. ¹⁴ haamin koyaynal naasadhan yin haapon wodanka ka dhalene: nee; kidhan wo deese»Hamo kisa wona ko shidhe» hamate kinka ki dhalqade. ¹⁵ Woynin haaqanasa haamira worndar bulayse, kidhan ki deesade.

«keeda; woynin hatasa imba igira haamin koyayna eenadar yer harr kin haaye yena ko maate? ki ¹⁶ woyinin haatasa imba kidi yinti na'a ki ne'e; igira haamin koyaynadhani desa ki dese: woynin hatasa raqindhan eedi waanina ki imee.» ki hamade. eenal ogodhan yin qanson wodanka« ko disino yin ko dabode!» ki hamade.

¹⁷ Yesusl kidhan shedate yin ki giyade:-«keda oonin woysaynayn bagaa seene kidi

seena wul gidra kati zaske ki maatade hamayse thaapadhono bulno harr? ¹⁸ Seene kadar dhamee wul pala ki pale, seenel yindare dhamee wul gicima ki gicime.»

¹⁹ Gudullasa hayonabee thaapinabe, Yesus ko kansin kin giyono daraan kon doondhan dhesayse; agaa wodaka yedana zagayse ki daade;- ko daanal zarisndhan ki pembhade.

Bitu Qesarna Gibirn Kashadhayno

[mat 22:15-22 mar 12:13-17]

²⁰ ogona Yesusdhan yedana zagayse kidhan kalate ki daade. peen wotse yisa hayamonka kinin paradodisi saskate imana kina maate apora kisa usip ki zagate ki daade; ogona tipana eena matayse; kisa dhalqindhan qansayna doyanadhan daran ki yitade. ²¹ doyanal Yesusdhan yin giyayse ki oysade:- tamarse yaa han giyenbee han tamarsenbe goon konin doondhan wodi dhesoda dhese. Bayrosa goyndhan goon hada tamarse eedi haynal woti shedima hanin hayndhan wodi dhesidine. ²² yinda wona giya; wosa danbin goynka roome peen bitaana gibiri kashadhamoo kashadhayu?»

²³ ko daanal Yesus kisa gadimakon dhesayse; kina yin ki giyade:- ²⁴ «yinda ina dinar kala dhoye: <dinadar daa potobe daran thapadhono namo haysane?» ²⁵ eenal «roome peen bitaa qesarsane» hamayse kina ki masade. kidil «Keda roome peen bita qesar gentadhan Qesarna imee; Bayro gentadhanl Bayrona imee» ki hamade. ²⁶ ogona kin giyon dhalqinka zarisinsa birante yedana damay; kisa masonka yershayse lay ki hamade.

Dembhira dhabadhensa Yesusin Oysadoono

[Mat 22:23-33; Mar 12:18-27]

²⁷ «dembhira dhabhe qole» hamayna Saduqawiansa waani waani yesusidar na;ayse oysime ki oysade:- ²⁸ yin ki giyade:-«tamarse eedi kala maa kemayse naasi adhima ki diyana kisa imba naasa geshon qambhindhan baskayse; naanadhan adhayse ishimena buqo ki wodee muse thaapedine. ²⁹ keeda tobha imba naana ki daade:- biraa geshondhan kemayse naasi adhima ki diyade: ³⁰ lansol agadisi: ³¹ Makansol pir ki baskade: tobhana agadisi kon bskayse naasi adhima ki diyade. ³² machintel geshono ko diyade. ³³ keeda tobhana kodhan kin baskona denbhira dhabhaddhen wodanka hay geshono ko dee?»

³⁴ Yesusl yin giyayse ki masade:- peen ko naana kema ki keme; kensa ki kensee;- ³⁵ dimbhira dhabhayse usi ni'en wodanka ki dee hambhana eena yina kemee kensee; ³⁶ Bayrosa erigan ginadisi kin doona keda diyee: dhembhira kin dhabhona Bayro kidi naanane. ³⁷ ko daanl Bayro diyanadhan dembhira kinin dhasendhan; dhoyana muse hatta kododar yeden nuunsa iinte; bita gebhadhan <Abraam Bayro, Yisaaqi Bayro, Yayqoob Bayro> hamayse eelidine. ³⁸ ogona Bayro sadanka daana eenasa Bayrone; komaal diyana eena Bayrotee; wul kisa sadanka ko dee.»

³⁹ thaapinasa;waani waani masayse «tamarse! payya hadaa giye» ki hamade. ⁴⁰ agasa budonte yer kalahtel oysana damaye.

Kirsitoos Hay Naasine?

[mat 22:41; 23:7 mar 12:35-40]

⁴¹ agasa budonte Yesus yin ki giyade:-«eeno kirstoosdhan dawit naasine»

hatte ko hamee? ⁴²⁻⁴³ harena habhidihana dawit yimal mezmur mathaapint yin ki giyade:-

«bita gebha, isa bita gebhana;

«hasa galaa eenadhan hasa hayamonsa demente inin hayenka yekka isa mizaqimbar dooqaa» ki hamade.

⁴⁴ keda Dawit kidhan: «bita gebha» hamayse kin eelenka hate ki dawit Naasi ki dee?»

⁴⁵ zarsino wul kidhan qansate ko daaka, Yesus tamarana yin ki giyade:-

⁴⁶ «Gudubhon apalan qadhayse yayana ; gaaban raqinte nagayan nashayna ;aywdi eenasa ooshin raqinte goshipin borkotondar doorqana zagayna; kuman raqintel goshipin raqin zagayna thaapnara yedhan gishee. ⁴⁷ kidil qamibhina maanasa oonadhan gursayna eenane; hapadhana hamayse miskendhan ki guudite: igira eenadhan kati siya pirdi kidhan ko kalee.»

21

Maan Qambhinin Bayrona Imono koymono

[Mar 12 : 41-44]

¹ Yesus dheg hamayse kinin shedenka, wodima eena koymonin dhabadhen angamonte koymon ki dhabaka ki haapade. ² pirl angi yensa koqlimno maa qambhi kalo santim lamaa ogote konin dhabenka ki haapade: ³ yin ki giyade:-« gon ida giye:- wul gidira sagi koro qambhino saskayse ko dhabade: ⁴ kira eena kin imono yisa doon koymorane; ko daanal kodi angi yensa koqlimno maa qambhi daayse kala hatel shishima kosa doon wul ko imade.»

Machin wodansa milkitno


[Mat 24:1-2 ; Mar 13:1-2; Mat 10:17-22]

⁵ tamarasa waani wanni «koro Bayrosa gazan oono payyan seenin payyanbee Bayrona imbhon imintonka goshipayse ko ashikadhade» hamayse kinin dhalqinka; Yesus yin ki giyade; ⁶ «koro yen shedayno oono kotima ko kotime kon kmotimena Seeni Seendar ashikdhayse yen hapimino wodano naa ko nee.»

⁷ Kidil:- «tamarse keeda koro kon maatayno hanee? pirl koro yin maataa konin sanonsa milkitno harr? hamayse ki oysade.

⁸ Yesusl yin giyayse ki masade:- «ye taysadhode yedhan gishee! gembho:«inta kirsitoosne wodano sandine!»hamate: isa nabinka ko ni'e igirasa panante yeebhode. ⁹ Banqinbee zarsinin kidar dhaabhenbe yenin qansen wodanka, targadhebhode. koro birayse maatana doonone: machino kosa sanayee.»

¹⁰ pirl yin ki giyade:- «zarsi zarsindar: binal binadar; dhabha ki dhabe:

¹¹ Peendar kati ziga, ko dee: daqibe, burqobe abi abi raqir dhaba ko dhabe: pinsayna yerabee garr milktina cacindar ki hapadhe.

¹² ko daanal «ko wul matima birayse eeno yedhan yeda ko yede; yedhan oyta ki oyte; aywdi eenasa ooshin raqintebbee dhaxen oonina saskayse imaa ki imee; isa nabina hamayse binabee peen wotisaynadar tiysaskayse ima ki ime ¹³ korol ina yetarje payya goyti ko maate. ¹⁴ Ogona haro masoo hamayse woynaminka qabebhode. ¹⁵ harna hambhidihana yesa gala palimayse yedhan kinin bahomadisi yena dhalqinbee pakalmakondhan ida ime. ¹⁶ Hambabee handabe hamba nanabee Eedanabe Aanama hatel shidhima yidhan saskayse ima ki imee: yekalankal waandhan deesa ki deese: ¹⁷ Isa nabinkal een wulkal jibadhan yeda maate. ¹⁸ Ko daanal yesa sitira kala hatel kayee:

¹⁹ wochimbayse woye sadandhan dhacha ki dhache.

²⁰ « Yerusaalemdhan banqin eenka kardhayse kon haapadhen wodanka, kosa kayenin yeskondhan dhese. ²¹ ogo wadaanka yiwudar dana dukandar ko gobe:gabante daanal ogora ki utee:gurdaante daanl Gabanadar ardan ki gare: ²² harna hambhidihana thaapadhono wul ko maaqee koro haalo wadane. ²³ peendar kati gar gaale ko dee: ko zarisindar Bayrosa wacime ko nee; ogo wodanka maana sirmanabe amin qooshayna indanabena hay! ²⁴ kisa iira gebho zarsinol halpan goradenka ko deesadhe: waandhan banqin kansayse bashayse eendhan peen wuldar ba'ate ki yaade; Ayiwuditay hama eenana imbhadhon wodanin maqenka yeka yerusaalem Ayiwuditay hama Eenasa kantanka tigadha ki tigadhe.

²⁵ «haynbee arpinbe ezinibedar milkiti ko haapade. bazin tobhirensa koshiin kon qansekabe peensa ginbatenkabe Zarisno qabima ko qabime; ²⁶ cacinsa kantno kon wandhena; Eeno pimbhekabe Peendar na'ayno hare hamate kalate pimbha ko pimbhe. ²⁷ Ogo wodanka Eedi Naas kantanbe gebhi goshipka polonbete ki na'aka ki haape. ²⁸ ydil kiraa yeraa maqate kin doona yesa dhaqono kon saanona tipi hamayse woyee: tura dheg hamayse shedee.»

²⁹ pirl yin hamate kaa kansedhan ki giyade:«shapinbe haaqan wul shedee: ³⁰ Haqansa qalbhen qanaysaka yin haapen wodan ogoka le'en dobin saanon yidi yemal dhese. ³¹ agadisi pir kira yera yin kin maatendhan yenin haapen wodanka yedil Bayrosa bitamono kon saanon dhese. ³² « gon ida giye:- koro wul kon maatenka yeka ko adhadhonsa bizaano kaayee;

³³ Cecinbe peenbe saga ko sage; qalo isa sage.»

³⁴ «peen kodar doon wozana hamayse yeenin zagadisi maatayse baridhate; peen kosa daayintanka qabimate ogote yeedaka; aga rooro zandisi yeedhan kinin yedomodisi yedhan gishee. ³⁵ ogoro peen wul gidir da'ana wuldar yeska ko yekee. ³⁶ ogona ne'en wul gidra yee dhaqe eedi naassa birante woyana yee damee, rooro wul wochimbhayse miskee.

³⁷ Yesusl rooron rooronka misken Ooninte tamarasate sootinka debirezayt hambhen dukandar utayse kida wodhe. ³⁸ zarsinol wul kidhan qansana

sedhimanka misken Bayrosa gazan oonindar na'ate ko daade.

22

Yiwuda yesusdhan saskayse Imana Kinin Dhalqono

Mat 26:14-16; Mar 14:10-11

¹ wodan ogoka Paasika^y hambhen balashan ba'alo sanayse ko daade.

² Gudulasa hayonabee thaapinabe zarsendhan kinin pemibhona, adhimbayse yesusdhan yin deesensa goyti zagate ki daade.

³ meshinol tabhi lamanabete paydadha Asqoronto yiwda hambhe gidir ko ardade: ⁴ Yiwdal gudulasa garabee gazan oonindhan kalaynasa garedar ya'ayse yesusdhan hate sasikayse yin imendhan ki dhaliqade. ⁵ kidil ogoka wozadhayse koymo kina imana kimbete kinka ki dhalqade. ⁶ kidil yernka ee hamayse sasikayse imana zarisinin qolima agee woda kalate ki daade.

Yesusa Machin Galano

Mat 26:17-25; Mar 14:12-21; Wan 13:21-30

⁷ agara keda Paasikan^z yaate mashadhen balashan ba'allo ko yeskade.

⁸ Yesusl «Paasikansa galan won isen ya'ayse wona ashkee» hamayse Bhethiroosbee Wannisbedhan ki yitade. ⁹ kidil «Hamote wo ashke hazage? » ki hamade. ¹⁰ kidil yin ki giyade:- «Gabante yenin aradenka, noqon daan baska eedi yedar kama ki kamee: kinin arden oonindar yeka kisa paanante yee: ¹¹ ooninsal imbana:«Tamarse< isa tamarbete kinka Paasikan galandhan kinin isayno shoshina ranqo hamotene?» ki hamade.» hamee. ¹² kidil poqin oonindar apayse ashkadhon woren oonindhan dhoya ki dhoye: ogote wona ashkee.» ¹³ Kidil ya'ayse Yesus kina kin giyadisi ki haapade. Paasikan galandhan ogote ki ashkade.

¹⁴ Galan isadhen wodan yeskaysaka, Yesus yisa ergan genabete kinka kumana ki doorqade. ¹⁵ yin ki giyade:-«Galen I tiyma birayse ka paasikadhan yenbete kinka isana kati angardhate I daade: ¹⁶ yin ida giye:- Bayrosa bitamonte gonin aashino machi konin haapadhenka yeka keda kara ko paasikan balashandhan isatine.»

¹⁷ Woynin haatasa wucadhen tiyayse Bayrodhan yinin goshiponsa budonte,yin ki giyade: «Tiye: wulate kora woce: ¹⁸ gon ida giye: kara yidayse Bayrosa bitamono konin ne'enka yeka, kaa woynin haatasa aapin wucatine.»

¹⁹ Agara Yesus balashadhan dhasayse Bayrodhan yinin goshiponsa budonte qunthate tamarana imayse: « koro yena imbhayno isa waanone: kodhan isa bhocina hayee.» ki hamade. ²⁰ agadisi pir kumansa budonte woynin haatasa wucadhen tiyayse yin ki giyade:- « koro wucadhayno yena isa lalmayno zombhino haalin malintonone. ²¹ ko daanal idhan saskayse imee ea imbete

kinka kumatene. ²² eedi naasl birayse gidhadisi diya ki diyee: ko daanal eedi naasidhan saskayse imee aga eana hayi. ²³ tamaral wosa sharinte ogo yerindhan hayee eedi hayne? hamayse kinka kikal oysiman ki yedade.

²⁴ pirl wosa bakra sage hayne? hamate kinka kikal palman ki yedaade.

²⁵ Yesus yin ki giyade:- «Aywdita hama bina zarsin ynoondhan kantanka ki wotisee kidil yina payyan hayaynane hamayse ki eelade. ²⁶ yegidral agadisi ko dabhode; ko daanal yekalanka gar mata lika ki maate;-wotise matal waadiman tiye ki mate. ²⁷ harna hambhidihana kumana doorqabe woyayse waadmebesa hayne sage? Kummandar doorqaatayu? inta yesa shaarinte daa ea waadiman gentadisine.

²⁸ ydil i kalanka pegbhima galen wodanka wochimbhayse woymine: ²⁹ imba eedhan ki bitinsade, intaal pir isa bitamondar yena hayamon imayda imee; ³⁰ isa bitamonte kummandhan koummatebe wucetebe pirl bitamon borkotondarar doorqayse tabhi lamaana Israel eenasa muldhanadar yeda parade.»

³¹ pirl Yesus yin ki giyade:- «Simoon, Simoon! sheda; meshi gazgodisi yedhan hanqarsana ki miskade: ³² ko daanal inta hanin amanono kayan ko gare hana hamayse i misikade; yal han maaton wodanka hamba naanadhan wochinsa.» ki hamade. ³³ Simoon! « bita gebha, inta dhaxin oonindar waginl dembhi konal hambete kinka ya'ana inta dhakimebhine; ki hamade.. ³⁴ Yesus! «Bhethiroos, qansa: kina basha olima, dhettine hamayse makkan goyt hada hamee »ki hamade.

³⁵ agara Yesus «qalishibee; surbabe, dunguribe qolima yedhan inin yiton wodanka yesa jogaa yer daaw?» hamayse ki oysade. «kidil yer wosa jogaye »ki hamade. ³⁶ kidil yin ki giyade: « ko daanal ta qalishibee surbabe yinsa daa eedi ki yedee; Halpan Goraden ynisa qolminal apalandhan shanshayse ki shanee. ³⁷ yin ida giye: «Seeson genabete kinka ki paydadhine» hamayse thaapadhono kina maqa ko zasike; harnahambhidihana isa thapadhono maqana ko daade.» ³⁸ Tamaral:«bita gebha: sheda! halipa gorade lamaa kote dane» ki hamade. kidil:«yeekidine»ki hamade.

Yesus Dabirezayt Duukadar Kinin Miskoono

Mat 26:36-46 Mar 14:32-42

³⁹ Yesus lele gentadisi utayse Dabirezayt Duukandar ki ya'ade, tamaral kisa panante ki ya'ade. ⁴⁰ ogotel kinin yeskon wodanka:«taysate ye ardodee miske»ki hamade. ⁴¹ ki kalanka lika pegadhayse kumburssayse ki miskade: ⁴² «imbo! ha nashidi hana ko galendhan ikalanka tiya;ko daanal yin giyno ko dabhode; han giyono ko dee;» hamate miskate ki daade. ⁴³ Bayrosa ergan gental cacira kina hapadhayse kidhan ki kanetisade. ⁴⁴ kati qabimayse wochimbhayse miskate ki daade: ermanol zombhidisi peendar dhibhate ko daade.

⁴⁵ Miskera dhabhayse tamaradar ki ni'eanka:- tamaral guman diyayse wodhayse ki daysaka ki hapade: ⁴⁶ «harne wodhe? taysondar ye ardabhode dhabhayse miskee!» ki hamade.

Yesusin Yedadhoono

Mat 26:47-56 Mar 14:43-50 Wan 18:3-11

⁴⁷ Yesusl akar dhalqate ki daaka gembhi eeno ko na'ade: tabhi lamansa kala Yiwuda hambhel een ensayse ki na'ade: sunqana Yesusdar ki thezade.

⁴⁸ Yesusl «Yiwuda, eedi Naasidhan sunqayse saskayse ha imo?» ki hamade.

⁴⁹ Yesusbete daana eenal hambhen shedayse, «bita gebha; halpan goradenka kidhan wo taxo?» ki hamade. ⁵⁰ kisa kalaa na'ayse gudullasa worsho qame mezaqadhan ki taxade. ⁵¹ Yesusl: «gare! kaabishe ee hamee» ki hamade: easal qamenhan latayse ki pacade.

⁵² Agaral Yesus yedana na'anadhan gudullasa hayonabee: gazan oonindhan kalaynasa gembhabe donzanabedhan yin ki giyade: «eedi shutadisi hayayse idhan yedana halpa goradebe boko quurabee ba'atee ye na'aa? ⁵³ roro wul gazan ooninsa iinte yembete kinka inin doonka yesa anindhan idar dhasitene: ko daanal yembe thipansa hayobesa wodane;» ki hamade.

Bhethiroos Yesusdhan Dhetine kin Hamono

Mat24:69-75 Mar 14:66-72 wan18-16-18 25-27

⁵⁴ kasa budonte Yesusdhan yedayse ba'ate gudulasa wulsa gare ooninte ki arsade: Bhethiroosl pegeka kesa paanante na'ate ki daade. ⁵⁵ eeno gudulasa gare kermnsa iinte nuu guttayse kinka doorqayse ki daaka: Bhethiroosl kembete doorqayse ki daade.

⁵⁶ Bhethros nuunsa gasante dorqayse ki daaka maaa kallo ooninte wadimaynol may shedayse:kaal pir kimbete kinka ki daade» ko hamade.

⁵⁷ Bhethros; «eediwa koro, inta kidhan dhesatine!» ki hamade. ⁵⁸ lika kin kapayse budonte eedi abi kala kidhan shedayse;«yaal pir kinbete kalanka ha daade»ki hamade. Bhethrosl« yaa ea intatee! ki hamade.

⁵⁹ Sa'aat kaladha kapayse eedi abi gon:«ea kaa galila eedi kin doona, gon kimbete kinka ki daade hamayse ochayse ki giyade.» ⁶⁰ Bhetiros«yaa ea hanin giyne yiren dhesatine!»ki hamade ogodhan giyate ki macima Basha ki oolade.

⁶¹ bita gebhal wal hamayse Bhethirosdhan ki shedade: Bhethiroosl «kina basha olima makan goyt < kidhan dhesatine> hada hame hamayse kin giyono kina Bhoqe ko hamade. ⁶² Bhethiroosl mayanka utayse kati ki eepade.

Polisana Yesusdhan kin Bagono

Mat 26:67-68 Mar 14:65 Wan 18:22-23

⁶³ Yesusdhan dhaxayse kalate daana eena kidhan bagatbe qanani ki yidade:

⁶⁴ aapindhan oshayse, «yaa Bayro kalanka qansayse eena giye hana yina giya hadhan qaana hayne?» hamate kidhan koda oyse. ⁶⁵ gebhe iirme iirmate bagimate ko daade.

yesus Bhlatosbe Herdosbesa Birante Kinin tidhono

Mat 26:57-68 Mar 14:53-65 Wan 18:19-24

⁶⁶ peenin sedhen wodanka zarsinsa donzanabee, gudullasa hayonabee, thaapenabe ki bukade: Yesusdhanl kisa birante ki woysade. ⁶⁷ kidil« ya Kiristoosu? yinda wona giya» ki hamade. Yesusl yin ki giyade « i giydi hanaal amanetene; ⁶⁸ i oysinal ina masatene. ⁶⁹ Ko daanal taki kara yedayse eedi Naasi Bayrosa kantanka mizaqambar ki doorqe.» ⁷⁰ wodan ogoka :- « ta ya Bayro Naasiw?» ko hamade. Kidli «Bayro naasi inin dondhan yidi gidine» ki hamade. ⁷¹ eenol «keda kara usi tarja har ko zaske? wodi wonti ki giyaka qansidine»ko hamade.

23

¹ ogote bukana wul dhabayse Yesusdhan Bhilatosedar ki tiyade: ² «yin hamate kidhan birsan ko yedade « ka ea wosa zarsindhan ki wospakabe , Qesarna gibiri kashan ki garee marate perl inta kirsitoosne ki hamaka wo haapade.»

³ Bhelathosl «ya Ayiwd eenasa bitaaw?» hamayse ki oysade. Yesusl «inta hanin giyadisine» ki hamade.

⁴ Bhilathosl gudullasa hayonabe zarsina: «inta ea kadar kala hatel seeso haapatine» ki hamade. ⁵ ko daanal eenol «kaa ea galila peera yedayse kodar yeka tamarsate yiwuda peen wul shedhima zarisindar wajoo ki dhasade» hamate kati ko giyade.

⁶ Bhilathosl ogodhan yinin qansenka, ea kaa galila eedi kin doon dhesana ki oysade: ⁷ Yesus Herodisin wottsen peera kin noonadhan Bhlatos kin dheson wodanka: Heradosi ogo wodanka Yerusaalem gider kin doona daran ki yitade.

⁸ Herodisil yesusdhan gebhi wodaka haapana zagate kin doona: yin hapon wodanka katti ki wozadhade: harna hambhidihana kisa qansayse kin doona:- tarshen waadimandhan kin ashekinka hapana katti zagate ki daade. ⁹ gebhi oyso ki ooyade: kidil yer kala hattel kina maasaye. ¹⁰ Gudullasa hayonabe thapaynabe ogote woyayse kati bersate ki daade ¹¹ Herodisbee kina poolisanabe kidhan bagayse boyidine; goshepi apala qattayse philathosdar maasate ki yittade.

¹² Herodisbee Philathosbe rooro agaka kisa nash ki maatade; birayse kisa sharnte wache daade.

¹³ Bhilathosl gudullasa hayonadhan: wotisaynabe, zarsinbedhan kidar puchyse:- ¹⁴ yin ki giyade:- «kaa ea zarsindhan wajona ki dhaase hamayse

idar bayse ye daade: intaali yesa birante kidhan marmarayse: yenin berson birnsa kala hattel seeso haapatine. ¹⁵ pirl Herodis yer kala haatel kin hapamona wodar maasidene: yen shededisi kaa ea didar yesikese yer kalal ashikaye:- ¹⁶ ogona ^a inta qanayse bulayda bule.» ¹⁷ ogo kina giyono balinka kala dhaxi eedi kina ki bulidhe kon zasgenane. ^b ¹⁸ zarsino wul kinka hamayse: «kaa ea usi kaysa ! Barbaandhan wona bule!» hamate ko ilatade: ¹⁹ Barbaanl gabansa iinte zarsindhan uri dhasayse eedi disayse dhaxadha eedine.

²⁰ Bhilathoosl yesusdhan bulana kin zagona: per masayse ki giyade: ²¹ ko daanal zarisnol : «roka! roka! » hamaate ilatate ko daade. ²² Bhilathoosl makan goyite: «harna? kaa ea yer kin seesa seeso haar? inta diina kidhan yiskese kala haatel seeso daran haapatine: ogona qanayse bulayda bule» ki hamade. ²³ ko daanal zarsinol ushindhan dheg hayayse rokaa hamate kati ko oysadee: ilatinol katti kantane.

²⁴ ogona Bhilathoos kin oysono ko haydhe uspi ki saskade. ²⁵ zarsinin oyson goynka ean desayse dhaxadha Barbaandhan kina ki bulde; ko daanal ;Yesusdhan kin oysadisi ki desadhe saskayse ki imade.

Yesusnin Rokadhono

Mat 27:33-44 Mar 15:22-32 Wan 19:17-24

²⁶ Yesusdhan yedayse ensate ki ye'enka: Simoon hambhe qarana peen ea gurdara gabandar kin ne'enka yedayse masqalindan baskinsayse Yesussa paananate ki ye'e ki hayade.

²⁷ gebho zarsino kisa panante na'ate ko daade; zarisinsa bakinte sadandhan tuqate eepayna maana ki daade. ²⁸ Yesusl daran wal hamayse yin ki giyade:- «Yedi Yerusaalem maana: yenbe yesa naanabena eepee; ina eepebhode: ²⁹ harna hamidihana <sekinabee amin qoshama maana goshepadhanane> hambhadhayno wodano na'aa ko ne'ee. ³⁰ ogo wodankal ««duukandhan:«wodar ko dhambe» dhuukiltanal:<wodhan aashee> koda hamee.» ³¹ keda haaqa shiteka yin haydi kena; woshen haqanka hati ki hayo?»

³² kinbete kinka ki desadhe waan eedi lamaa dhabin genadhan ki tiyade. ³³ qaraniyo waginl meete hambhe raqadar kin yesikon wodanka Yesusdhan ki rokade: dhabin eenasa kaladhan mizaqandar wadhan warkatanbar ki rokade.

³⁴ Yesusl: « imbo! kinin hayendhan kin dhesimona kisa seesondhan garaa» ki hamade. kisa apalan kashimana itha ki dhabade. ³⁵ zarsinol woyayse shedate ko daade. Peendhan wotsaynaal pir : «wandhan pachidine; kidi Bayroka kambha Kiristoos kena; yinda yedhan ki pache!» hamaate kidhan boyate ko daade. ³⁶ Poolisanal aagadisi ki boyade daran thzayse thorkin woyinin wocin kina ki imade. ³⁷ «ayiw d bitaa hanna, hadhan pachaa» hamate kidhan boyate ko daade. ³⁸ kisa bhabar « kaa Ayiw d bitaane;» hamayse thaapadha ki daade.

³⁹ Yesusbete kinka rokadhanasa dhabin genasa kalaa; Yesusdhan; « yaa Kirstositayu? yinda:- haanbee wonbedhan phacha!»hamate iirmate ki daade.

⁴⁰ ko daanal waa dhabin genta yin hamayse ki wacimade:-« yaa dembhen pirdindar dayse Bayrodhan pimbhatanu? ⁴¹ wodi wonin hayon dhabin goynsa wona zasiken dhabin haapidine; ko daanal kaa ea kala hatel dhabi hayaye.»
⁴² «Yesusisna « bita gebha hasa bitamon ni'en wodanka eedhan qaba» ki hamade. ⁴³ Yesusl « gon ida giye; kina inbete kinka kina genetinte hada dee» ki hamade.

Yesusin diyono

[Mat 27:45; Mar 15:33-41; Wan 19:28-30]

⁴⁴ wodano sa'at laxadha ko daade; sotinol sa'at salidar yekka, peen wuldar thipa ko matade. ⁴⁵ Haynol sotidine: gazan ooninsa gidinte rokadhono apallo kedhada raqi lamadar ko ha'ade. ⁴⁶ Yesusl uspi garka ki iilatade «imbo, isa sadandhan hasa aante saskayse ida ime!» ki hamade. ogodhan giyayse ki diyade.

⁴⁷ polisansa garel hamon yerndhan yin haapon wodanka,« kaa ea gon tipa ki daade» hamayse Bayrodhan ki goshipade. ⁴⁸ ogo yerindhan shedana ogote bukayse doono eeno wul hamon yerindhan ynin haapon wodanka, gumandiayse yisa sadandhan thugate yisa oonadar ko matade. ⁴⁹ ko daanal kidhan dhesayna wul Galila peera kisa paanante na'ana maanal ogodhan shedate pege woyayse ki daade.

Yesusdhan Duukadhoono

[Mat 27;57-61;mar15:42-47 wanns 19:38-42]

⁵⁰ wodan ogoga yiwuda peente Armatias gabante Yoseep hambhe ea ki daade; kidi eedi gaza ki daade; aywdi eenasa oshin oshaynasa kidi kala ki daade. ⁵¹ kaa ea aywdi eenasa klimankabee kisa chubamon waadimankabe kinbete kinka waadimay; kidi Bayrosa ni'an bitamondar sholon quntayse kale eedi ki daade. ⁵² kaa ea Bhilathos birante thzayse; Yesussa leesino kina ko imbhe ki oysade. ⁵³ Leesindhanl masqalira hanshayse; talibara ashikadhon apalaka oshayse seeni layta palsayse ashkadhon eedin duukadhamon oolonsa iinte kidhan ki duukade. ⁵⁴ ukunsen roorona ashkimbhadhano wodano ko daade .

⁵⁵ Galilara yedayse Yesusbete kinka na'ana; maanal Yoseep paanante ya'ayse duukendhan ki haapade : kisa leesndhan hate kin duukondhan ki haapade. ⁵⁶ agara maatate oonindar ya'ayse payya game gamrebee shittobe ki ashkade; ukunsin roroonka kina dabinka gidhadisi ki ukunsade.

24

Yesusin Diyayse Dembhira Kin Dhabhoono

Mat 28:1-10 Marq 16:1-8; Wan 20:1-10

¹ Maana yinin ashikon shiton yedhayse wuudi burin sedhiman duukindar ki ya'ade. ² Senol Duukinsa apora gunnguma kotayska ki haapade. ³ oolonsa iinte ardayse bita gebha Yesussa leesindhan haapaye.

⁴ kidil yerin hamonka yin hamen kaysayse ki daaka; shede;eedi lama bhalqaten apalan qadhana kidar ki theezade; ⁵ Maanal kati pemibhayse mee peendar yirki hamayse ki daaka; Bayrosa ergan gena yin ki giyade:- « sadanka daadhn diyana eenasa shaarnte harnee zagee? ki hamade. ⁶ kidi kote qolee dhabhidine, galilar kin doon wodanka yena kin giyondhan bhoche: ⁷ «eedi naasidhan seeson eenasa aaninte saskayse kin imbhadhen kin rokayse desa ki desahe rooro makansoka dembhira dhabha ko zasike» hamayse yena ki giyon qabe.» ⁸ maanal Yesusn giyon ki bhocade;

⁹ maana duukin raqira maatayse ko wul yerin tabhi kalanabe een waani wulna ki giyade. ¹⁰ kodhan eergan genana giyanal megdela peen esono Mayriyambee, Yohannabee, Yayqoobsa indano Mayriyambe; kinbete kinka daana waani maana ki daade. ¹¹ ko daanal kidi maana kina kin giyono dhalqino haama kon matona amanaye. ¹² ko daanal Bhethiroos dhabhayse duukindar ki gobade; ogote yeskayse yirk hamayse kin shedenka, leesin yinka oshadhe taliban apala bish ki haapade; hamon yerinka yershimate yisa oonindar ki ya'ade.

Yesus Emahus Goynte Tamara Lamanana kin Haapadoono

Mar 16:12-13

¹³ rooro agka Yesusa panante ya'aynasa lamaa Yerusalemira roonka sa'aat lamadha pegadha Emahus hamayse eeildhen gurdandar ya'ate ki daade: ¹⁴ kidil yerin hamon wulidhan kinka kikal dhalqate ki daade. ¹⁵ kin dhalqinbe kin marmarenkal; Yesus yinti theezayse kinbete kinka ya'an ki yedade: ¹⁶ ko daanal yesusdhan dhesan ki gare eenasa aapino dudayse ko daade.

¹⁷ kidil:-«ogynte ya'ate yedaaka, kinka yen dhalqayno yer harr hamayse ki oysadee» kidil qaabonka guuman diyayse lay hamayse ki woyade. ¹⁸ kisa kala Qeleyoobha hambhe kina roorona igiraka kote Yerusalem gidir yerin hamondhan dhesma ya peensa shoshiwu?» hamayse ki masade. ¹⁹ kidil «ogoro yer hamono harr?» ki hamade. kidil yin ki giyade:-« Bayrobe een wulsa birante waadimanbee dhalqinbeka kantanka daa Bayro kalanka qansayse eena giyee Nazertu Yesussane. ²⁰ kidhan Gudullasa hayonabee zarsin wottaynabe dembhina saskayse ki imaysaka, masqalindar ki rokade. ²¹ wodi Israeldhan dhacha ki dhache hamayse wondar sholon quntha kidine: yin komaysaka kinaka rooro makane. ²² ko wulsa bashi wosa bakira waani maana wodhan ki tarshade, kidil kina sedhiman duukindar ki ya'ade: ²³ kisa leesindhan yin haapamon wodanka na'ayse, kidi dhembhira dhabhayse

sadanka kin doondhan kina giya Bayrosa ergan genta Bayrokal yer kin haapadisi ki giyade. ²⁴ wosa shaarinte waani duukindar ya'ayse: maanayn may wona giyondisi ki haapade, ko daanal Yesusdhan hapaye.»

²⁵ Yesusl yin ki giyade :-«yidi Bayro kalanka qansayse giyayna eenan giyon wul bhochimina, woynaminka amanan garayse kapana: ²⁶ Kiristoos ko gaalendhan tiyanabee gobshindar ardanabe kina zaskayu?» ²⁷ Musebe Bayro kalanka qansayse eena giyayna wulira yedayse Mathaapeen Gazante kisa thaapadhon ki giyade.

²⁸ yin ye'en gurdandar yin thezon wodanka , Yesus sagayse kin ye'e ki pansade. ²⁹ eenal hayno ibanidine, peenol sootate kon doona wokal wodha hamayse ki miskade. ogona kimbete kinka wodhana ki ardade. ³⁰ kimbete kinka kumana kin doorqon wodanka; balashandhan tiyayse Bayrodhan goshipayse, qunthayse kina ki imade. ³¹ ogo wodanka kisa aapin bhoqaysaka kidhan ki desade: kidil kikalanka ki kayade. ³² kidil:- «Goynte wonin doonka wona kin giyenka, pir Mathaapeen Gazara giyate wona kin bulenka, wosa woynaminka wodi katti wozadhaate dotonu?» kinka ki hamade.

³³ ogo wodanka dhabhayse Yerusaalemdar ki matade, tabhi kalaanabe kimbete kinka daanal ogote kinka bukayse» ³⁴ kidil:-«bita gebha Yesus gon dhabhidine! Simoonal haapadhidine» hamayse kikal dhelqate ki daaka ki yeskade. ³⁵ lamaana tamaral goynte hamonbe Yesus balashandhan kinin qunthon wodanka hate kidhan kin dhesondhan kina ki giyade.

Yesus Tamara Yinana kin Haapadhoono

Mat 28:16-20; Mar 16:14-18; wan 20:19-23; Ye Wan 1:6-8

³⁶ ogodhan giyte ki daaka, Yesus yinti kisa shaarinte woyayse, «nagaya yena ko dee» ki hamade. ³⁷ kidi targadhayse ki pimbhade: luboo kin haapa ki pansade. ³⁸ Yesus yin ki giyade:- «harne pimbhaa ? harna qothimano yisa woymite ko ardaa? ³⁹ aaninbee roonbedhan isa shede, intane.pirl idhan lazayse shede inta yenin shededisi lubotee, lubosa, waabee lepibe qolee.»

⁴⁰ yin giyayse yisa aaninbee roonbedhan ki dhoyade.

⁴¹ kidil wozadhatebe yershate akar amanima ki daaka kidi yer isadhe daw?» hamayse ki oysade. ⁴² Kedil kaarasa waa koqadhaa likka ki imade: ⁴³ kidil tiyayse kisa birante ki isade. ⁴⁴ kidil:- « yembete kinka inin doon wodanka, «Musea dambin mathaapinabee, Bayro kalanka qansayse eena giyaynasa mathaapinabee, Mazmur mathaapinabesa iinte isa thapadhoono wul ko maqe ko zask» hamayse in giyoono korone» ki hamade.

⁴⁵ Ogo wodanka Mathaapin Gazante thaapadhondhan ki bhoche woynamin kina ki bulade. ⁴⁶ yin ki giyade:- «yin giyayse thaapadhidine «Kiristoos gaalendhan kida tiyee: makanso rooroka dembhira dhaabha ki dhaabhe: ⁴⁷ pir kisa naabenka seeson waadimandhan garayse Bayrodar maatadhenbee seeso garintabe Yerusaalemra yedayse peendar doon zarsin wulna koda

giidhe» hamayse thaapadhidine. ⁴⁸ yedil kona tarjanane. ⁴⁹ intal Imba ina imon shelon yendar qunthen yena nitayda nitee ko daanal yedi bhaa cecira kantan yen tiyenka yeka, Yerusalem gabante kapee.»

Yesus Cachindar Dhabhayse kinin yo'ono

Mar 16:19-20;Ye Waa 1:9-11

⁵⁰ gosa budubar Yesus Tamaradhan bitaniya guridandar ensate ki utade: aanindhan dhaasayse kina pathi ki imade. ⁵¹ kina pathin imate daaka kikalanka idimayse dhabhate cachindar ki utade . ⁵² kidil kina goodimayse kati wozanka Yerusalemdar ki maatade: ⁵³ Bayrodhan goshipate rooro wul Bayrosa gazan ooninte ki daade.